



JORNAL

do

Parlamento Nacional

VI. LEGISLATURA

1.ª SESSÃO LEGISLATIVA (2023-2028)

REUNIÃO PLENÁRIA DE 07 DE AGOSTO DE 2023

Presidente: Ex.^{mo} Sr. Alexandrino Afonso Nunes

Vice-Presidentes: Ex.^{mos} Srs.

Secretária: Ex.^{ma} Sr.^a Virgínia Ana Belo

Vice-Secretárias: Ex.^{ma} Sr.^a Maria Terezinha da Silva Gusmão

SUMÁRIO

Sr. Presidente (Alexandrino Nunes) declara aberta sessão plenária iha tuku 9 liu minuto 22, dadeer no halo leitura ba agenda trabalho loron ne'e nian.

Antes da ordem do dia - Discussão no aprovação ba voto de pesar n.º 2/IV (1.ª) kona-ba falecimento Madre Ydalia Taveras Taveras nian.

Iha intervenções diversas, Sr.^a Deputada no Sr. Deputado sira aborda kona-ba: estrada aat iha terminal Becora; comportamento polícia trânsito sira-nian iha estrada; falta transporte atu tula prisioneiro sira; atraso iha pagamento osan han nian ba funcionário quarentena nian sira; polémica ligada ho atuação membro F-FDTL nian balu iha festa ida iha Oe-Cusse; trabalhador timoroan serbisu iha

Correia do Sul no Austrália ne'ebé halai sai husi sistema; polémica ko'a veterano sira-nia osan pensaun ho valor 30 USD kada fulan; construção estátua saudoso Mateus Sinarai nian ne'ebé abandonado; pessoal Segurança Lorosa'e nian sira seidauk simu osan durante tinan haat nia laran; uma sira-ne'ebé harii iha natar laran; motorista sira ne'ebé conduz ho velocidade aas; necessidade atu halo socialização ba ema la'o-ain sira kona-ba atravessa passadeira; falta bee moos iha Município Manufahi; associação transporte nian sira-ne'ebé tula carga iha porto Díli maibé to'o agora loja-na'in la selu sira; lamentação husi população iha Covalima kona-ba existência jogo *bola guling*; continuação tratamento saúde ba paciente Domingos Ximenes iha Bali; inflação folin foos iha mercado; qualidade husi material construção nian ne'ebé fa'an iha loja chinesa sira; responsabilidade atu lori fila trabalhador timoroan sira ne'ebé mate iha rai-li'ur; ausência Presidente Parlamento Nacional nian no mós Presidente da República RDTL nian husi país iha tempo hanesan; distância entre passadeira sira iha estrada Díli laran; problema gestão lixo iha Díli laran; destino husi professor contratado sira ne'ebé serbisu tinan barak ona; rai monu iha estrada direção Ainaro no Same nian; falta luz elétrica iha Suco Mauchiga; importação ai-moruk ne'ebé ninia prazo besik atu expira ona; número caso soe bebé ne'ebé aas; ideia atu Parlamento Nacional hala'o cerimónia hasa'e bandeira iha segunda-feira dahuluk kada fulan; falta bee-moos ba comunidade sira iha Díli laran; falta controlo Governo nian ba comunidade sira ne'ebé harii uma iha rai Estado nian; falta promoção ba guarda prisional sira iha sira-nia carreira; impacto negativo husi circulação cigarro ilegal; calamidade iha município Manufahi, Suai no Viqueque; Parlamento Nacional precisa ratifica Convenção

Internacional para a Proteção de Todas as Pessoas contra os Desaparecimentos Forçados; uso lia-português nian iha escola primária sira; dependência maka'as Timor-Leste nian ba foos importado; transporte público sira ne'ebé tula passageiro liu fali sira-nia capacidade; hapara contrato ba voluntário sira iha serviço DRTTM Manufahi; falta carro funerário iha Município Manufahi; casal ida ho deficiência física ne'ebé moris kiak rabat-rai; plantação koto agricultor nian iha Same ne'ebé hetan estragos tanba udan boot; atraso iha instalação eletricidade nian iha suco balu iha Posto Administrativo Turisca; ahi mate causa husi udan iha parte Pássabe, Oesilo no Nítibe; abandono projeto reabilitação hotel ba Ambeno oan sira; declaração Administrador Posto Lautém nian ne'ebé discrimina feto; atraso iha pagamento ba projeto sira-ne'ebé finaliza ona; ideia atu Parlamento facilita cartão identidade Parlamento nian ba Deputado sira; basculante sira-ne'ebé tula rai-henek la ho cuidado; ahi mate lakan iha Posto Administrativo Bobonaro no Lolotoe; estrada aat iha Posto Administrativo Lolotoe; foos folin aas iha Município Bobonaro.

Tuirmai Vice-Ministro dos Assuntos Parlamentares fó resposta assunto no questão hirak ne'ebé Deputado no Deputada sira foti.

Ordem do Dia - Sr. Deputado sira ne'ebé halo intervenção maka Duarte Nunes (CNRT), António da Conceição (PD), Mariquita Soares (FRETILIN), Aliança da Conceição Araújo (CNRT), Abílio Quintão Pinto (FRETILIN), Olinda Guterres (KHUNTO), Maria Gorumali Barreto (CNRT), Cedelízia Faria dos Santos (CNRT), Natalino dos Santos Nascimento (CNRT), Florentino Ximenes da Costa «Sinarai» (FRETILIN), Gabriel Soares (CNRT), Sância Florência Paixão Bano (FRETILIN), António Verdial de Sousa

(KHUNTO), José Virgílio Rodrigues Ferreira (CNRT), Helena Martins Belo (FRETILIN), Óscar de Araújo no Aliança da Conceição Araújo (CNRT), António Moniz Calau (FRETILIN), Luís Roberto da Silva (KHUNTO), Patrocínio Fernandes (CNRT), David Dias Ximenes «Mandati» (FRETILIN), Antoninho Doutel Sarmiento (FRETILIN), Lúcia

Taeki (CNRT), Abel dos Santos (PLP), Irene Gonzaga Sarmiento (KHUNTO), José da Cruz (FRETILIN).

Sr.^a Presidente taka sessão plenária ne'e iha tuku 13 liu minuto 11.

Sr. **Presidente** (Alexandrino Afonso Nunes): — Bom dia ba distintas e distintos Deputados, favor bele hola fatin ita atu hahú ita-nia serbisu iha dadeer-saan kmanek ida-ne'e.

Horas hatudu tuku 9 liu minuto 22.

Bem-vindo e bom dia ba Sr. Vice-Ministro dos Assuntos Parlamentares, ne'ebé iha fatin ona.

Dala ida tan, ami bolu distinta e distinto Deputado sira atubele hola fatin, tanba horas hakat ona ba iha 9h22 minutos.

Di'ak, hanesan baibain, iha loron-segunda primeira semana ita hahú ho execução hino nacional, Pátria. Mai ita hotu-hotu hamriik hodi canta hino nacional.

Hotu-hotu hamriik hodi hananu hino nacional, Pátria.

Bele tuur filafali.

Informa ba Sr. Secretário-Geral no funcionário sira hotu atu filafali hala'ó kna'ar hanesan baibain.

Obrigado.

Di'ak, bom dia ba distinto Deputado e Deputada sira hotu, Excelência Vice-Ministro dos Assuntos Parlamentares, bem-vindo e bom dia. Excelência povo doben ne'ebé namkari iha Timor laran no iha rai-li'ur, mídia no rona-na'in sira ne'ebé rona hela ita-nia programa ida ohin, dala ida tan ha'u hato'ó bom dia.

Ha'u fiar katak ohin dadeer-saan ida-ne'e ita bele hasoru malu tanba Na'i Maromak nia tulun iha Uma-Lisan ida-ne'e ho boa disposição para ita bele começa ita-nia serbisu ne'ebé iha agenda, orsida ha'u sei lê ida-idak.

Iha ita-nia oin, iha mesa, ita iha agenda ba ohin loron nian.

Reunião plenária da segunda-feira, dia 7 de agosto de 2023.

Abertura ita hahú ona ho hino nacional, ita hakat ona bá Período de Antes da Ordem do Dia.

1. Anúncio da realização de viagem privada do Presidente da República a Jacarta, entre 5 e 9 de agosto, comunicada pelo ofício de 1 de agosto 8 de 2023, nos termos e para os efeitos do n.º 3 do artigo 80.º da Constituição.
2. Discussão e votação de voto de pesar pelo falecimento da Irmã Ydalia Taveras Taveras
3. Intervenções diversas dos Senhores Deputados
4. Intervenção do Sr. Vice-Ministro dos Assuntos Parlamentares sobre as questões suscitadas pelo Senhores Deputados.

E, Período da Ordem do dia: Anúncio de abertura do prazo para a apresentação de candidatos a membro da Comissão da Função Pública a eleger pelo Parlamento Nacional».

Di'ak, atu habadak tempo ha'u fó ba Secretária atubele....,

Iha interrupção tanba técnico DIPLÉN halo consulta ho Sr. Presidente da Mesa.

... Atu fó-hatene, iha agenda n.º 1, katak Presidente hala'ó hela viagem privada, tuir artigo 80.º da Constituição da República, n.º 3, atu participa iha *Jakarta* ba 40.º aniversário jornal *Jakarta Post* ne'ebé hahú iha dia 5 to'o dia 9.

Ida-ne'e mak atu hato'o de'it ba distinta e distinto Deputado sira hotu.

Tuirmai, ami fó tempo ba Sr.ª Secretária atu pronuncia agenda n.º 2.

Sr.ª **Secretária da Mesa** (Virgínia Ana Belo): — Obrigada, ba Sr. Vice-Presidente.

Bom dia ba Ita-Boot, ba colega Deputado sira hotu no mós ba Vice-Ministro.

«Voto n.º 2 / IV (1.ª), de pesar pelo falecimento da Irmã Ydalia Taveras Taveras.

Faleceu, no passado dia 29 de julho, a Irmã Ydalia Taveras Taveras.

Nascida na República Dominicana em 2 de janeiro de 1938, a Irmã Ydalia, oriunda de família simples e humildes, descobriu cedo a sua vocação religiosa e entrega a Cristo e à Igreja Católica.

Com formação académica, bacharelato na área das ciências físicas e naturais e licenciatura em sociologia, integrou inicialmente a Congregação das Carmelitas e viveu parte da sua vida noutras paragens para além da sua terra natal, tendo passado, designadamente, por Espanha, onde terminaria ano noviciado, Porto Rico e Roma.

Em 1981, foi colocada e fixou-se em Timor-Leste, onde viria a exercer o sacerdócio e a sua ação caritativa, espiritual e profissional até morrer. Cabe enaltecer, em particular, o apoio que deu a alguns filhos de veteranos da libertação nacional que se encontravam no mato a lutar contra o invasor, mais tarde devolvidos aos pais, ajudando a criá-los e prestando-lhes, desde tenra idade, a assistência, nomeadamente alimentar, de que necessitavam.

Conhecida do povo timorense, é com emoção que lhe prestamos a nossa homenagem, agradecendo-lhe toda a atividade de amor ao próximo e ajuda aos mais pobres e desafortunados da sociedade, desenvolvida durante o tempo em que esteve entre nós.

Assim, o Parlamento Nacional, reunido em sessão plenária, expressa o seu profundo pesar pelo falecimento da Irmã Ydalia Taveras Taveras, que guardará para sempre na sua memória, endereçando sentidas condolências a famílias e amigos enlutados.

Parlamento Nacional, 7 de agosto de 2023.

Deputados e Deputadas proponentes,

Duarte Nunes, Armando dos Santos Lopes e Mariquita Soares.»

Obrigada, Sr. Presidente.

Sr. Presidente (Alexandrino Afonso Nunes): — Obrigado.

Antes atu fó tempo ba Deputado sira hodi halo apreciação, iha-ne'e atu fó tempo uluk ba proponentes atu pronuncia liafuan ruma.

Sr. Duarte Nunes (CNRT): — Obrigado, Sr. Presidente em exercício, membros da Mesa, colegas Deputados.

Kona-ba voto de pesar ba Irmã Ydalia, ha'u hanoin, parte ida mós ha'u ladún saida, maibé importante ita haree ba nia apoio ne'ebé durante ita-nia maluk sira ne'ebé seidak mai, balu mate iha ai-laran maibé nia família ne'ebé iha-ne'e hetan apoio, hetan tulun atu nune'e sira bele moris iha condições ne'ebé di'ak. Ho apoio sira-ne'ebé nia halo, hanesan ema mai husi li'ur maibé ho nia sentimento, nia domin ba ita-nia ema sira ne'e mak, ita hanoin, karik nia mós merece atu ita fó ita-nia voto de pesar ba nia.

Iha parágrafo tolu, ha'u ohin assina tiha maibé ha'u la repara, horisehik ha'u mak sala, ida «exercer o sacerdócio» ne'e ha'u la hatene, depois colega hirak ne'ebé hatene, ha'u hatene de'it, sacerdócio mais para os padres, não é? Maibé se madre sira mós bele, ne'e sira lian-na'in mak hatene e ha'u husu colega sira-nia interpretação para depois ita labele hamosu documento oficial no fim ita hatudu ita-nia... ladún di'ak.

Ne'ebé, ha'u husu ita lê didi'ak, colega sira, favor ida. Ha'u mós mai assina tiha mak lê nia saida mak ha'u repara, katak karik ida-ne'e, ba ha'u, keta la apropriado karik.

Obrigado, Presidente.

Sr. Presidente (Alexandrino Afonso Nunes): — Muito obrigado.

Keta iha tan balu atu hato'o antes ita fó tempo ba iha Deputado sira?

Por favor, Deputado António da Conceição.

Sr. António da Conceição «Kalohan» (PD): — Obrigado, Sr. Presidente em exercício.

Bom dia ba Vice-Presidente e composição da Mesa, Sr. Vice-Ministro dos Assuntos Parlamentares, Deputada e Deputado sira hotu.

Ha'u fó mós testemunho kona-ba Irmã Ydalia ne'e. Loos, ne'e missionária ida-ne'ebé tama iha período da invasão, iha-ne'ebé seidauk iha licença para missionário estrangeiro sira tama iha Timor. Maibé, consegue tama iha Timor iha padre salesiano na'in-tolu, iha Madre ida-ne'e, madre carmelitana, Madre Ydalia. Padre salesiano tolu mak Padre Walter, mate ona, Padre Rolando, ho Padre José Vataparambil Sira-ne'e tama iha ano 80, ne'ebe ita-nia situação sei difícil hela, e sira-ne'e mak consegue hetan autorização tama. Irmã Ydalia ne'e tama tanba husi República Dominicana, ne'e mak nia tama. Ha'u hatene tanba ha'u sei seminarista natoon ne'e.

Ligado ba saida mak Deputado Presidente Bancada CNRT ohin ko'alia, ha'u mós halo observação duni ba ida-ne'e, ne'ebe, ha'u hanoin, termo próprio la'ós mak ida «exercer o sacerdócio» ne'e, maibé bele substitui liafuan ida-ne'e ho «função missionária carmelitana» para depois nia ne'e mai hanesan missionária carmelitana, ba ordem carmelita sira-nian. Ne'e para bele halo loos tiha liafuan ida ne'ebé bele contraditório mós ba ita tanba ita seidauk, Timor seidauk ko'alia kona-ba atu fó ordenação ba feto sira.

Obrigado.

Sr. **Presidente** (Alexandrino Afonso Nunes): — Obrigado.

Por favor, Sr.^a Deputada.

Sr.^a **Mariquita Soares** (FRETILIN): — Bom dia ba Sr. Presidente em exercício, composição da Mesa no mós colega Deputado sira.

Iha-ne'e ha'u hakarak atu hatete de'it katak madre Ydalia ne'e madre ida-ne'ebé uluk, iha tempo difícil, ita-nia veterano sira-ne'ebé 24 anos iha ai-laran sempre fó hela sira-nia oan sira ne'ebé nia tau-matan. Se ha'u la sala, ami husi veterano balu ninia oan ne'ebé husik hela iha-ne'ebá, madre sira tau-matan iha tempo ne'ebá. Iha indonésia nia tempo ne'e buat ne'ebé difícil tebes no iha interrogação ba madre sira, maibé madre sira sempre, ho fuan boot, bele tau-matan nafatin ba labarik sira, ne'ebe, ha'u hanoin, madre ne'e merece atu hetan mós voto de pesar.

Obrigada.

Sr. **Presidente** (Alexandrino Afonso Nunes): — Obrigado.

Tuirmai, Deputada Aliança de Araújo.

Sr.^a **Aliança da Conceição Araújo** (CNRT): — Obrigada ba tempo.

Bom dia ba Sr. Presidente do Parlamento Nacional interino, Sr. Vice-Ministro dos Assuntos Parlamentares, ba Ita-Boot sira hotu, distintas e distintos Deputados, mídia, rona-na'in sira ne'ebé agora iha laran no mós iha li'ur.

Ha'u mós atu ko'alia uitoan sobre Madre Ydalia. Madre Ydalia ne'e madre ida que di'ak, barani, fuan-boot, corajosa. Iha momento ne'ebá ha'u mós sei hala'o hela serbisu resistêcia nian, clandestina nian, ho amo, matebian, José Martins, amo João Filgueiras, daudaun sei moris hela ne'e.

No entanto, nia mós husu ajuda ba ha'u atu fó mós explicação ruma ba noviça sira-ne'ebé iha hela Madre ne'e nia liman, ne'ebe momento ne'e amo na'in-rua ne'e mós husu ba ha'u be ha'u mós hatán. Iha mais ou menos 1986, 1987, 1988 e 1989, momento ne'e ha'u sei iha Externato, maibé ha'u mós fó explicação balu ba seminarista sira iha Bispo Medeiros ne'e, ho mós madre Ydalia nia noviça sira-ne'ebé atu completa sai madre.

Momento ne'ebá ne'e difícil tebetebes, Indonésia sira mós, quando ita hanorin lian português ne'e tuir hela de'it ita, tau-matan hela de'it ba ita. No entanto, Madre ne'e ho coragem, no barani tebetebes, loroloron nia tem que acompanha sira to'o Bispo Medeiros. Semana ida ha'u fó aula dala rua.

Alem disso, ami sei ko'alia uitoan sobre ita-nia maluk sira iha foho, iha ai-laran, passa halo nu'usá, maluk sira-ne'ebé nia oan sira escola la iha osan atu selu sira-nia escola, buat barak.

Ne'ebe ha'u sente katak madre ne'e la'ós ona dehan iha nia rain, maibé nia ne'e hanesan *termasuk* mós ita-nia maluk timoroan sira-ne'ebé serbisu ajuda ita hotu.

Ne'ebe, ha'u sente, ida-ne'e ita iha obrigação atu fó voto de pesar ba nia.

Mak ne'e de'it, obrigada.

Sr. **Presidente** (Alexandrino Afonso Nunes): — Obrigado.

Iha-ne'e regista ona na'in-tolu liga ho apreciação ba voto de pesar Madre Ydalia, e, ha'u hanoin, na'in-tolu ne'e pára ona para ita bele avança ona ba agenda seluk.

Fó tempo ba Deputado Abílio Quintão husi FRETILIN.

Sr. **Abílio Quintão Pinto** (FRETILIN): — Obrigado, Presidente.

Bom dia ba Presidente, Sr. Vice-Ministro dos Assuntos Parlamentares, distinto colega Deputado sira hotu.

Iha terceiro parágrafo, iha-ne'e hakerek «espiritual e profissional até morrer», karik ita bele revê uitoan ida-ne'e, ita bele hakerek «até ao último momento da sua vida». Karik ita bele hakerek hanesan ka oin seluk uitoan tanba ne'e português ida, ha'u hanoin, ladún di'ak liu ba ita-nia Madre ne'e.

Obrigado, Presidente.

Sr. **Presidente** (Alexandrino Afonso Nunes): — Obrigado.

Tuirmai, Deputada Olinda Guterres.

Sr.^a **Olinda Guterres** (KHUNTO): — Bom dia ba Sr. Presidente em exercício, colegas Deputados, Secretária da Mesa, ba hotu-hotu.

Sr. Vice-Presidente, iha-ne'e ko'alia tiha ona, dehan balu atu sai madre mas la sai madre, balu atu sai padre mas la sai padre ne'e ko'alia loos hotu ona, ne'ebe, madre ida-ne'e ema hotu conhece e ha'u mós hatene nia. Colega sira ohin ko'alia ne'e loos hotu, Madre ne'e serviço duni ba ita-nia bei-oan, ita-nia oan sira, balu agora sai matenek, ne'ebe, ha'u hanoin, ha'u repete mós ladún di'ak, tanba ne'e secunda hotu de'it na'in hira ne'ebé ko'alia ne'e. Maibé, ida «sacerdócio» ne'e mak, hanesan expadre Sr. António da Conceição ko'alia, loos ona, orsida bele halo loos iha DIPLÉN, ne'ebe ita procede ba votação. Agora, Madre ida-ne'e nia serviço ne'e Timor hotu hatene, la'ós ita sira ne'ebé tuur iha-ne'e de'it mak hatene, maibé ema hotu-hotu hatene. Ema ne'ebé iha ai-laran, momento ne'ebá 1984 bá ai-laran, 1982 sa'e ba, 1984, 1999 ema ne'e conhece didi'ak Irmã ne'e, ne'ebe nia ne'e merece duni atu ita fó voto de pesar ba nia, ne'ebe, ha'u hanoin, ita procede ba votação. Ita dudu bá dudu mai la kleur horas ne'e muda daudaun. Intervenção bele, mas kona-ba voto de pesar, mais ou menos ema na'in-rua ne'ebé sai proponente ne'e ko'alia, ida aumenta, loos ona.

Obrigada, Sr. Presidente.

Sr. **Presidente** (Alexandrino Afonso Nunes): — Obrigado, Deputada.

Sei iha tan, Deputada Maria Barreto. Halo favor.

Sr.^a **Maria Gorumali Barreto** (CNRT): — Obrigada ba oportunidade.

Ha'u-nia bom dia ba Sr. Presidente interino no mós composição da Mesa, distinta e distinto Deputado sira hotu, Sr. Vice-Ministro no mós audiência tomak.

Primeiro, ha'u-nia sentidas condolências ba família Madres Carmelitanas ne'ebé lakon madre superior ida, ne'ebé iha figura ne'ebé di'ak tebes iha Timor-Leste.

Ha'u hakarak cita uitoan katak iha votos de pesar ne'ebé iha ha'u secunda ho proponente Deputado Presidente Bancada CNRT no mós ha'u-nia colega Deputada Mariquita Soares tanba ida-ne'e mak Madre Ydalia hala'o iha Timor. Maibé ha'u hakarak atu dehan katak Madre Ydalia ninia serviço maka'as liu mak iha parte clínica carmelita nian.

Ha'u conhece nia di'ak iha 1997, wainhira ami hahú harii FOKUPERS iha Timor-Leste, e FOKUPERS coopera maka'as liu ho madre carmelitana sira hodi fó atendimento ba feto maluk sira ne'ebé sai vítima husi militar Indonésia iha tempo ocupação Indonésia nian. Buat ne'ebé nia halo tebetebes mak hala'o atendimento ba vítima sira husi militar indonésia sira, liuliu vítima violação

sexual ne'ebé hetan intimidação no mós agressão física husi militar indonésia, madre mak sempre la' o hamutuk ho FOKUPERS oinsá atu hetan acesso ba vítima sira-ne'e.

Missão boot ida-ne'ebé nia halo mak atendimento wainhira acontece massacre iha Igreja Liquiçá. Quando evacua vítima sira-ne'ebé hetan kanek todan husi Igreja Liquiçá mai iha Díli, paciente quase bá hotu iha Clínica Motael, e iha tempo ne'ebá Madre fó nia tempo tomak atende vítima husi lokraik to'o fali dadeer, e sempre acompanha, fó atendimento hodi cura kanek sira husi vítima sira iha Massacre Liquiçá nian iha 1999.

Ha'u hanoin, ida-ne'e mak ha'u hakarak atu hato'o e Madre Ydalia merece duni, tanba nia mós hetan condecoração husi Presidente da República, nia merece duni Parlamento Nacional atu fó voto de pesar ba nia.

Ha'u hanoin, ida-ne'e de'it mak ha'u hato'o e, dala ida tan obrigado barak.

Sr. Presidente (Alexandrino Afonso Nunes): — Obrigado, Deputada.

Ikusliu, Deputada Cedelízia, tempo ami entrega.

Sr.^a Cedelízia Faria dos Santos (CNRT): — Obrigada barak, Sr. Presidente em exercício.

Ha'u-nia bom dia ba Ita-Boot, composição da Mesa, distinto Deputado sira, mídia, maluk rona-na'in sira hotu.

Ha'u hanoin, ha'u lakohi comentário barabarak tanba luta ou contribuição ne'ebé Irmã Ydalia contribui ona ba ita-nia rai doben Timor-Leste, ha'u só hakarak fó-hanoin uitoan.

Hanesan ohin Deputada Maria Barreto mós cita uitoan ona, karik bele ita mós tau iha ita-nia voto de pesar ida-ne'e katak iha fulan-junho Madre Ydalia mós simu ona condecoração husi ita-nia Presidente da República ho Ordem de Timor-Leste. Ha'u-nia sugestão de'it, se bele considera, karik bele ita mós cita iha voto de pesar ida-ne'e katak iha fulan-junho nia mós simu ona condecoração Ordem de Timor-Leste husi ita-nia Presidente da República. Ida-ne'e hatudu katak Presidente mós fó ona apreciação ba ninia luta, no ikusmai nia mate, Parlamento mós fó ninia de apreciação. Ne'ebe, karik bele, técnico sira coordena didi'ak, husu fali informação detalhada husi Palácio do Presidente para bele inclui mós ponto ida-ne'e iha ita-nia voto de pesar.

Obrigada barak.

Sr. Presidente (Alexandrino Afonso Nunes): — Obrigado.

Ha'u hanoin, la iha ona, antes ita atu tama ba eleição, ha'u fó-hanoin filafali ba técnico sira atu haree redação ne'ebé ohin Deputado sira fó-hanoin para bele completa halo didi'ak, e agora ita tama ona ba votação. Desculpa, la'ós eleição, ami-nia hanoin ne'e eleição foin liubá ne'e sei manas hela, desculpa.

Obrigado.

Mai ita prepara ba votação, iha-ne'ebé iha a favor, abstenção no contra.

Di'ak, sé mak vota a favor, contra no abstenção, idakidak foti ninia *kartu*.

Deputado sira hala'ó votação ordinária.

Obrigado. Desculpa, tanba ne'e ha'u-nia primeira jornada be imi compreende bá!

Ha'u atu ko'alia karik, ha'u *start* husi quilometragem zero, ne'ebe imi compreende. Maibé ha'u tenta atu aprende loron ba loron.

Obrigado.

Sr.^a **Olinda Guterres** (KHUNTO): — Lalika ta'uk!

Hato'ó ona ba votação voto de pesar n.º 2 / IV (1.º), hetan ona aprovação ho voto a favor 54, contra 0 no abstenção 0.

Sr. **Presidente** (Alexandrino Afonso Nunes): — Ho nune'e, ita tama ba agenda n.º 3, intervenções diversas dos Senhores Deputados.

Iha-ne'e regista ona na'in-hitu, ne'ebé ami hahú ho Deputada Olinda Guterres husi KHUNTO.

Sr.^a **Olinda Guterres** (KHUNTO): — Bom dia ba Ita-Boot, ba Sr.^a Secretária da Mesa, ba colegas Deputados hotu, ba maluk rona-na'in sira no ba jornalista sira hotu.

Iha-ne'e ha'u hakarak foti kona-ba estrada iha Terminal Becora. Ami KHUNTO ninian foin daudauk Deputada Irene foti tiha ona, mas to'ó agora seidauk tau atenção.

Ha'u fila husi Hera mai precisamente ha'u hamriik to'ó 10 a 15 minutos para polícia sira dudusees carreta sira-ne'e para ita bele tama, dala ruma livre, dala ruma taka metin hela.

Funcionário husi DIPLEN consulta ho Sr. Presidente da Mesa.

Senhor Presidente, ha'u ko'alia depois Ita-Boot mak bisu-bisu tan, orsida ha'u ko'alia la saida tan...

Sr. **Presidente** (Alexandrino Afonso Nunes): — Rona hela.

Sr.^a **Olinda Guterres** (KHUNTO): — ... di'ak, Sr. Presidente.

Ida fali, hakarak fó atenção ba polícia trânsito sira, quando sira hamriik iha dalan para fó sinal ne'e ba hamriik iha fali estrada sorin, ida-ne'e ladún di'ak. Ema choque malu karik mate saugati. Polícia trânsito, loloos ne'e hamriik iha dalan para bele fó sinal ba carreta ida-ne'ebé liu no ba ida-ne'ebé pára.

Ida fali, ita-nia prisioneiro sira iha prisão tolu, castigado sira-ne'e aumenta no iha Prisão Gleno ne'ebá feto de'it, feto barak liu mak iha Gleno ne'ebá, maibé preocupação ba sira-ne'e mak ne'e, carreta atu tula sira atu mai tuir julgamento la iha, iha maibé aat. Mas sira obriga tula castigado, prisioneiro sira-ne'e mai iha dalan mak carreta falha oinsá? Ne'e la preocupa ita hotu?

Ne'ebe, ha'u hanoin, iha dadeer-saan ida-ne'e ha'u hakarak fó-hatene ba Sr. Ministro, fó-hatene ba Ministro da Justiça atubele hatama ba iha Orçamento Retificativo ne'ebé mai ou selae OGE 2024 nian, tanba quando carreta mak falha iha dalan, castigado sira halai, polícia mós, quando la tahan, bele tiro. Ida-ne'e.

Ne'ebe, ha'u hanoin, Sr. Ministro, favor ida hato'o hela bá, karik bele ajuda carreta tolu, ba Suai, Oe-Cusse, Baucau, Díli Becora tanba sira carreta foun ida la iha, carreta mesak *besi tua* de'it mak iha-ne'ebá. Quando tula prisioneiro sira ba tuir julgamento iha tribunal karik sira ba ho saida? Ta'uk mak carreta mate iha dalan ka aat iha dalan, ida-ne'e perigo ba ita-nia povo sira-ne'e hotu.

Ha'u hanoin, ida-ne'e de'it mak ha'u hato'o.

Sr. Presidente, ohin Ita-Boot dehan katak Ita-Boot ema ne'ebé mai husi zero, ita hotu-hotu mai husi zero, *apa lagi* ha'u, mai husi to'os ho natar, colega sira barak hatene, ne'ebe labele minimiza Ita-Boot nia an. Ita hotu mai apreende, la'ós dehan katak ida hatene no nia tem que tuur iha-ne'e, ne'e la iha! *Tidak ada yang seperti itu*, la'o ba oin de'it, lalika hateke tun fali mai iha-ne'e, ami hamnasa ka la hamnasa, tonka liman ka, bá-mai ka, Ita-Boot lalika tau atenção ba ida-ne'e, *fokus* loos de'it ba serbisu.

Obrigada, Sr. Presidente.

Sr. **Presidente** (Alexandrino Afonso Nunes): — Obrigado, Deputada.

Tuirmai, Sr. Deputado Natalino dos Santos.

Sr. **Natalino dos Santos Nascimento** (CNRT): — Obrigado ba tempo.

Bom dia ba Sr. Presidente, composição da Mesa, Sr. Vice-Ministro dos Assuntos Parlamentares, ba distinto colega Deputado sira.

Sr. Presidente, ha'u, dadeer ida-ne'e, hakarak foti questão rua: ida, kona-ba funcionário quarentena 53, inspetor, ne'ebé destaca iha portão entrada e saída Timor-Leste nian, começa iha janeiro 2022 to'o agosto, e to'o ohin loron sira-nia osan han nian sira la hetan. Triste tebes! Sira husu

atu tau atenção porque sira hala'ó serbisu nu'udar dever ida destaca sira iha posto integrado hotu-hotu iha fronteira, maibé sira-nia osan *catering* ka osan han nian husi janeiro to'ó agosto 2022, husi dezembro to'ó ohin loron sira seidauk simu. Ida-ne'e preocupação ita-nia funcionário sira ou inspetor 53 pessoas ne'ebé destaca iha portão entrada no saída iha fronteiras.

Aat liután, sira ne'ebé funcionário permanente iha Sakato, quarentena nian, fulan-julho ne'e sira seidauk simu osan. Além de sira la simu osan han nian, sira-nia vencimento fulan nian, inclui mós fulan-julho, sira seidauk simu. Tanba ne'e sira husu mai iha Parlamento Nacional, liuliu ba Governo, Sr. Vice-Ministro, atu haree assunto ne'e hodi bele canaliza ba ministério tutela atu haree condições ita-nia funcionário quarentena sira ne'ebé iha Posto Mota-Ain, Oe-Cusse, Suai Mota-Masin, Porto e Aeroporto Díli, Baucau no Lospalos. Sira quase la hetan osan han nian, que ne'e nu'udar direito ida, ne'ebé estipula tiha ona iha lei.

Tuirmai, ha'u hakarak clarifica assunto ida que foin semana liubá acontece, relaciona ho *acara* casamento ida iha Oe-Cusse, katak «Força sira ba halo atuação usa kilat no farda». Ha'u hakarak clarifica assunto ida-ne'e iha-ne'e, ita-nia Força sira ne'ebé destaca iha Posto Sikone, Oe-Cusse, sira hetan convite husi festa-na'in. Sira bá nu'udar convidado, iha convite ne'e rasik hakerek «convida Comandante Posto Sikone ho membro», tanba ne'e mak sira mós marca presença nu'udar instituição tanba convite refere la'ós convida pessoal, maibé convida instituição. Sira bá festa nu'udar convidado, bá ho farda no usa atributo tanba convida F-FDTL hanesan instituição. Sira bá ho *kado*, sira bá to'ó iha-ne'ebá, festa-na'in simu sira e sira hola parte iha cerimónia. Bainhira ko'a *cake* no loke champanha, sira-nia comandante mós hola parte no bainhira sira tama ba festa nu'udar militar, sira husik hela sira-nia agente ka soldado ne'ebé laho farda iha li'ur atubele observa. Soldado ne'e Oe-Cusse oan, to'ó festa hotu jovem balu iha li'ur começa ko'alia ona dehan hakarak atu tuda F-FDTL sira, «orsida sira mai sai ita tuda sira». Então, soldado oan ne'e rasik rona, halo atuação, husu: «Tanbasá mak imi hanoin aat hanesan ne'e?», ho nune'e mak começa cria ona condição que la saida. Tanba ida-ne'e mak Força mai atua, la'ós mai baku maibé atua sira.

Informação ne'e ha'u confirma ho comandante operação Oe-Cusse katak Força sira la ba halo atuação hanesan ho farda ka ho kilat hodi bá ameaça povo, lae! Sira bá tanba jovem balu lanu mak halo provocação. E triste tebes, sira husu desculpa, comandante ne'e husu desculpa, taka liman dehan katak «Se sala, ita tuur, ita ko'alia», maibé iha agitação barak que jovem barak halo população pânico, hanesan atu halo fali *penyerangan* ba Força sira, sira tuda fatuk ba carreta, sei iha carreta laran F-FDTL sira-nian. Tanba ida-ne'e mak sira lamenta tebetebes, Deputada sira mai seidauk confirma sasán loloos, foti atuação ne'e no condena Força sira-ne'e. Tanba ne'e ha'u hakarak clarifica iha-ne'e, sira bá nu'udar convidado, sira la'ós bá tanba bá de'it, lae!

E triste liu, quando iha ona problema hanesan ne'e, Presidente Autoridade rasik hasai casaco hodi hatete liafuan mal educado ba Força sira, perdão, desculpa iha Plenária, liafuan «caralho» ba

Força sira, tanba ne'e sira lamenta tebetebes ho atitude ida-ne'e. Ha'u hakarak ko'alia porque ha'u halo clarificação ho Comandante Operação Polícia Nacional iha Oe-Cusse, até agora seidak iha vítima ida mak ba halo queixa iha polícia, até agora! Tanba ne'e hakarak clarifica, sira bá nu'udar convidado, sira la'ós bá halo atuação quando iha problema.

Iha convite completo ...

Sr. **Presidente** (Alexandrino Afonso Nunes): — Bele conclui, Sr. Deputado.

Sr. **Natalino dos Santos Nascimento** (CNRT): — ... tanba ne'e ha'u hakarak husu ba ita, bainhira atu foti declaração ruma tem que clarifica ho fontes, labele ita mai generaliza sasán sira-ne'e. Karik ita lakohi F-FDTL destaca iha-ne'ebá, di'ak liu dada sai tiha sira husi ne'ebá. Tanba ne'e, nu'udar Deputado ida, hakarak clarifica katak loos duni sira bá nu'udar convidado.

Obrigado.

Sr. **Presidente** (Alexandrino Afonso Nunes): — Obrigado, Deputado.

Tuirmai, Sr. Deputado Florentino Ximenes. Por favor.

Sr. **Florentino Ximenes da Costa «Sinarai»** (FRETILIN): — Obrigado, Presidente.

Bom dia ba Presidente, componente da Mesa, colega Deputado sira, jornalista, povo rona-na'in, camarada buibere no maubere sira hotu.

Iha dadeer-saan ida-ne'e hakarak foti questão kona-ba trabalhadores ne'ebé ha'u foti iha semana rua ka tolu liubá. Ita-nia trabalhador sira ne'ebé sai husi sistema ne'e barak tebes, iha Correia no Austrália, tanba ne'e husu ba Sr. Vice-Ministro para bele hato'o hela ba Secretário de Estado SEFOPE (Secretaria de Estado da Formação Profissional e Emprego) katak situação ida-ne'e labele acontece beibeik, selae prejudica ita-nia maluk timoroan sira ne'ebé hakarak hetan oportunidade atu bá serbisu iha rai hirak-ne'e.

Ita hotu hatene, iha problema boot, trabalhador na'in-hira ne'ebé sai tiha husi sistema mate. Sorte que ita-nia Governo hatán lori sira fila, maibé se situação ida-ne'e acontece beibeik, sei prejudica ita-nia trabalhador sira ne'ebé hakarak mós sai bá li'ur.

Hakarak mós atu hatete katak ita-nia Força sira ne'ebé iha Oe-Cusse ne'e la'ós *ABRI Masuk Desa*, uluk mak *ABRI Masuk Desa*. Se convite ne'e fó ba instituição, instituição ne'e simu convite ne'e sala, tanbasá? Ema casamento ida baibain bele halo fali ida hanesan ne'e, então povo hotu-hotu Força F-FDTL tem que bá participa, labele ida ka rua de'it fali, ne'e sala boot. Tanba ne'e la iha *ABRI Masuk Desa*. Rai ida-ne'e sente triste ho hahalok pessoal sira hanesan ne'e, ne'e labele acontece iha ita-nia Rain! *ABRI Masuk Desa* liu ona.

Hakarak mós hola oportunidade ida-ne'e atu hatete tan ba Sr. Ministro Veteranos, altura quando VIII Governo Sr. Gil sei assume hanesan Secretário de Estado Assunto Veteranos nian, nia halo decisão ida ko'a tiha ema nia osan 30 dólares, que agora afeta tebes, sem halo consulta ida kle'an ho beneficiário sira. Tuur hamutuk ho grupo ida rua, halo decisão ko'a tiha de'it ema nia osan ne'e nem fó consideração ba beneficiário sira, no afeta tebes, la halo pesquisa ida kle'an molok halo atuação sira-ne'e. Tanbasá ema barak agora sai vítima ba situação ida-ne'e? Veterano balu oan la iha, osan ko'a halo saida? Balu tun husi ai-laran, oan mós la iha, feen, la'en mós la iha, osan ida-ne'e atu husik hela ba sé? Investimento ida-ne'e nia atu husik ba sé, se nia rasik geração la iha? La halo *pertimbangan* tasak didi'ak molok halo decisão hirak-ne'e. Tanba ne'e, Sr. Gil «Oan Soru» filafali ona ba assume Ministro Veteranos, haree assunto ne'e ho sério!

Ida tan, hakarak husu, uluk iha 2012 balu ba halo *patung* iha suco ida naran Bauró, Posto Lospalos Vila, *patung* ne'e atu halo ba Mateus Sinarai da Costa, to'o agora ema sira-ne'e mate tiha hotu de'it *patung* ne'e la *jadi* halo. Ninia continuação ne'e oinsá? Será que tá kanek hela hanesan ida-ne'ebá? Hanesan oan, ema ida nem fó hatene, sira-ne'e kala *kongkalikong* iha altura ne'ebá, tanba conhece imediato Sr. Primeiro-Ministro atual, tanba ne'e mak bá halo tiha decisão hirak-ne'e que nem fó consideração ba família. Hanesan oan, sente triste ho hahalok sira-ne'e. Ohin lora ema sira-ne'e Na'i Maromak bolu hotu ona, maibé ha'u husu ba Assunto Veteranos para haree, continua buat hirak-ne'e, labele husik abandonado hanesan ne'ebá.

Ha'u-nia hanoin, dadeer ida-ne'e hola oportunidade atu ko'alia de'it mak assunto hirak-ne'e.
Obrigado, Sr. Presidente.

Sr. Presidente (Alexandrino Afonso Nunes): — Muito obrigado, Deputado.
Tuirmai, Deputado Gabriel Soares.

Sr. Gabriel Soares (CNRT): — Obrigado, Presidente.

Bom dia ba Ita-Boot, Secretária da Mesa, colega distinto Deputado sira hotu, audiência, mídia tomak e povo doben Timor-Leste.

Ha'u iha assunto rua ka tolu atu foti iha dadeer ne'e.

Primeiro, em relação ho destino husi pessoais Segurança Lorosa'e, talvez mai halo audiência ona ho Presidente Comissão E ho colega Deputado sira, parabéns ba Ita-Boot sira bele atende mesmo ita foin hahú. Maibé atu fó-hanoin nafatin ba Excelência Vice-Ministro dos Assuntos Parlamentares, Ita-Boot inteira didi'ak assunto ne'e iha V Legislatura kona-ba destino ita-nia pessoais Segurança Lorosa'e sira-nian, to'o ohin ne'e, se la sala tinan haat nia laran ona, sira barak mak seidauk hetan sira-nia direito, por volta de quatrocentos pessoas, *empat ratus orang* liu. Balu, uluk iha Legislatura e

Governo anterior, lakon vida tan de'it sira hala'o sira-nia dever, maibé direito to'o agora sira la hetan. Ida rua mate tiha ona por causa de situação ne'ebé sira hasoru.

Segundo, ha'u hakarak fó-hatene mós ba Governo – assunto ne'e mós colega balu foti ona, maibé hakarak relembra de'it ba Governo – por causa de irrigação ne'ebé la di'ak, talvez comunidade balu consegue fa'an tiha sira-nia natar e uma balu consegue hamriik iha natar balu nia laran. Tanba ne'e husu nafatin no fó-hatene ba Governo para iha orçamento mai tau reabilitação ka halo construção didi'ak fali ba iha irrigação sira para que natar ne'e sai duni natar, comunidade labele hanoin katak «natar, se irrigação bee la tama ona, di'ak liu ami fa'an».

Hanesan daudaun Ita-Boot sira haree, iha Município Manatuto, parte Obrato, iha irrigação ida temi dehan Malarahun ne'e, Ita-Boot sira quando bá, molok tama ponte, ne'e halo natar ne'e halai dala rua, época primeira e época segunda. Mas depois, inundação liubá sobu irrigação sira-ne'e hotu. Ami fó hatene iha-ne'e, maibé resultado mak nune'e, e to'o ikus colega diretor nacional balu dehan «comunidade baruk-teen, lakohi halai natar», maibé lae! Irrigação mak la di'ak. Fó hatene, to'o agora seidauk hadi'a, e liuhosi ita-nia Plenária ida fó-hatene para que ba oin Governo, favor, tau-matan hela ba iha irrigação sira ne'ebé nia condição la di'ak para evita comunidade labele hanoin buat seluk, e labele hanoin atu fa'an fali natar, e labele halo fali uma iha natar laran. Ne'e segundo.

Terceiro, questão ida, quando rona Deputado Natalino justifica buat ruma iha-ne'e, ha'u, hanesan timoroan, mós sente, Força ho autoridade. Ami iha rai boot mai, hanesan maluk Oe-Cusse sira temi, maluk Oe-Cusse oan sira iha rai ki'ik, maibé ita mesak timoroan, quando ha'u rona justificação ohin ne'e, ha'u sente triste, ema número um iha RAEOA bele hasai liafuan ida ba ita-nia oan, ita-nia alin, ita-nia maun-alin sira ne'ebé iha Força Defesa. Ita bele ko'alia ba malu, maibé ita ko'alia ho ética. Liafuan ida ohin ne'e ita sente hanesan triste, satán ema mane ida ko'alia ba mane ida ho temi mane ida nia sasán lulik, ida-ne'e haree hanesan ladún iha ética. Precisa ita atu ko'alia ba malu, iha problema ruma ita ko'alia ba malu, satán autoridade ida ho Força Defesa nacional Timor-Leste. Se timoroan, ita tuur ko'alia ba malu! La precisa ita atu hasai liafuan maldade iha público e público bele haree, dehan: «Haree to'ok autoridade sira-ne'e, ema mesak boot, maibé ko'alia ba instituição la respeita malu», ética ne'e tem que iha uitoan. Sim, iha problema, tuur para ita bele resolve! Ha'u aprecia tebes ho justificação ne'ebé ohin Deputado Natalino fó liga ho assunto iha Oe-Cusse ninian.

Quarto, ha'u hakarak husu nafatin mós ba iha motorista sira, condutor sira, quando conduz carreta, estrada iha Timor laran ne'e quase barak kabeer, tanba atu evita kona-ba acidente mosu barabarak, husu para motorista sira bele ...

Sr. **Presidente** (Alexandrino Afonso Nunes): — Deputado bele conclui, horas.

Sr. **Gabriel Soares** (CNRT): — ...conduz carreta tem que halai ho cuidado, tanba dalan kabeer, sira mai ho velocidade ne'ebé aas, sira la iha estrada laran, halai fali ba estrada li'ur. Mós fó-hatene ba polícia trânsito atu halo socialização di'ak kona-ba ita-nia comunidade sira ultrapassa *zebra cross* ne'e.

Ita haree iha-ne'e *zebra cross* tau, maibé comunidade la liu, liu fali husi fatin ne'ebé la iha *zebra cross*, então ida-ne'e mós bele perturba motorista sira-nia condução quando sira conduz transporte.

Obrigado.

Sr. **Presidente** (Alexandrino Afonso Nunes): — Obrigado.

Tuirmai, iha ponto de ordem ida husi Deputada Sância Paixão Bano.

Sr.^a **Sância Florência Paixão Bano** (FRETILIN): — Obrigado ba tempo.

Sr. Presidente interino, Vice-Ministro dos Assuntos Parlamentares no colega Deputado sira hotu, ha'u hakarak clarifica intervenção semana kotuk kona-ba Força Defesa sira.

Ha'u hakarak clarifica iha-ne'e katak – ha'u, hanesan família, e ami festa-na'in – Força sira la'ós foin primeira vez acontece ida-ne'e, ha'u la'ós mai naran ko'alia. Ha'u rasik, iha momento ne'ebá, dia 29, depois de festa dia 28, contacta diretamente Tenente Coronel Sr. Armando Silva hodi informa. Festa ne'e dia 28, dia 29 sira foin mak ba husu se convite mamuk iha ka lae. Confirmado ne'e ami, festa-na'in, la fó convite. Desculpa! Ha'u la'ós mai naran ko'alia atu foti questão ne'e iha semana kotuk, ida-ne'e acontece, e Força sira baku duni agente polícia no jovem ida, baku dolar didi'ak iha-ne'ebá. Ha'u declara tan, horibainhira mak jovem iha RAEOA atu buka problema, satán ho Força? E acontecimento iha festa ne'e la'ós foin dala ida....

Sr. **Presidente** (Alexandrino Afonso Nunes): — Sr.^a Deputada, iha-ne'e registo quase ruanulu, bele conclui, tempo to'o ona.

Sr.^a **Sância Florência Paixão Bano** (FRETILIN): — Desculpa, mas ha'u husu tiha ona, Sr. Presidente, atu loke processo investigação ba processo ne'e, e Sr. Tenente responde duni ona. Sr. Deputado Natalino dehan iha festa laran, ha'u iha festa laran tanba ha'u festa-na'in...

Sr. **Presidente** (Alexandrino Afonso Nunes): — Bele conclui!

Sr.^a **Sância Florência Paixão Bano** (FRETILIN): — ... Favor tem que loke processo ba ida-ne'e.

Obrigada.

Sr. **Presidente** (Alexandrino Afonso Nunes): — Atu fó-hatene, iha ponto de ordem husi Deputado Natalino dos Santos.

Sr. **Natalino dos Santos Nascimento** (CNRT): — Obrigado.

Defesa de honra, Sr. Presidente.

Sr. Presidente, ha'u Deputado ida, quando atu foti intervenção, ha'u sempre *cross check*. Ha'u confirma ho comandante operação katak la iha vítima ida ba queixa iha-ne'ebá, então la iha torturação, la iha baku. Se iha vítima, tem que ba *lapor* iha polícia.

Segundo, ha'u bá ko'alia ho Comandante Posto Sikone, iha convite. Convite, sira manda mai ha'u, orsida sira ha'u bele fó, *print* fó-sai ba Ita-Boot sira. Dehan la iha convite, ne'e discriminação ida ba Força F-FDTL. Ha'u hakarak defende tanba sira bá ne'e bá coletiva, bá ho farda, e sira bolu representa Força para ko'a *cake* e loke champanha, tanbasá dehan Força sira ba hili fali convite? Ha'u hakarak clarifica, Deputado quando foti sasán sira-ne'e tem que iha veracidade, e lamenta tebes bainhira dehan ...

Sr. **Presidente** (Alexandrino Afonso Nunes): — Sr. Deputado, tempo to'o ona, tempo remata.

Sr. **Natalino dos Santos Nascimento** (CNRT): — ... dehan sira la convida, sira iha convite, *bukti* iha, convite. Ha'u mós aceita atu loke investigação tanba iha festa ne'e sira tau *drone*. Sira dehan: «Se bele, loke *drone* atu haree». Lamenta tebetebes, ha'u ko'alia tanba sira bá, tanba iha convite mak sira bá...

Sr. **Presidente** (Alexandrino Afonso Nunes): — Sr. Deputado, tempo to'o ona.

Sr. **Natalino dos Santos Nascimento** (CNRT): — ...Tanba ne'e, ha'u hakarak clarifica, antes ha'u foti declaração, ha'u confirma ho polícia Oe-Cusse e ha'u bá to'o Posto Sikone, ko'alia ho sira.

Obrigado.

Sr. **Presidente** (Alexandrino Afonso Nunes): — Iha-ne'e regista ponto de ordem barak tebetebes, Mesa la fó ona. E ha'u continua ba intervenção ba Deputado sira.

Tuirmai, Deputado António Verdial.

Sr. **António Verdial de Sousa** (KHUNTO): — Di'ak, obrigado, Sr. Presidente.

Ha'u lakohi discute malu, atu ko'alia buat ne'ebé realidade.

Ba dahuluk, ha'u aprecia no agradece tebes Comissão F nia serbisu. Iha semana kotuk ha'u hetan convite hodi substitui ha'u-nia colega António Verdial, Deputado, hodi participa halo fiscalização iha terreno. Ha'u haksolok tebes ho sira-nia serbisu, ha'u lakohi adianta tanba depois relatório sei tama.

Liga ba iha segundo dia, wainhira ha'u hakat ba iha rai Same hamutuk ho ita-nia Presidente Comissão A, ne'ebé trata assunto Constituição e justiça, ha'u haksolok liután bele halo fiscalização direta ba administração pública, especialmente ba área educação, saúde, terras e propriedades no registo e notariado.

Sr. Presidente, Ita-Boot rasik hamutuk ho ha'u, ita destacado ba rai Manufahi. Iha-ne'e, iha ita-nia Excelência Vice-Ministro ne'ebé trata Assunto Parlamentar, hanesan Manufahi oan, nu'udar Deputado, ha'u hatete, favor boot ida orienta ba Secretário de Estado ne'ebé trata assunto bee hodi bele trata bee iha rai Same, tanba bainhira ami destacado ba Same, fatin ne'ebé ami toba bee la iha. Sasán hirak-ne'e estraga kleur loos ona, ne'ebe husu Governo atu tau-matan atu nune'e povo Manufahi, especialmente *kota* Same, bele hetan bee.

Tuirmai, ha'u secunda saida mak ohin Presidente Bancada KHUNTO nian ko'alia. Iha-ne'e, ha'u atu fó-hanoin ba Governo. Hanesan Deputado ka iha qualidade nu'udar Deputado, iha Uma-Democracia ida-ne'e, ita hotu, 65, representa povo Timor-Leste, dala barak ha'u hatete katak instrumento político ne'ebé hadalan ita no lori ita mai Uma-Democracia ida-ne'e ne'e hanesan dalan de'it. Maibé, bainhira ita tama tiha Uma-Democracia ida-ne'e mak la iha razão, Deputado hotu-hotu, 65 Deputados, tem que sai defensor do povo. Ne'ebe, atu secunda saida mak Deputada Olinda ko'alia, especialmente ba guarda prisional sira. Hanesan ita hotu-hotu hatene, essencialmente ba prisão hirak ne'ebé mak ohin Deputada Olinda temi, assunto ne'ebé atu foca mak viatura ne'ebé mak guarda prisional sira usa geralmente avariado. Ho a variação viatura hirak-ne'e dificulta tebes serbisu operacional guarda prisional sira-nian.

Ha'u fó exemplo, hanesan ita hatene katak preso sira atu ba tuir julgamento iha tribunal sira iha Suai, Baucau, difícil tebes ba transporte. Husu ba IX Governo Constitucional, Ministério da Justiça, atu prioriza assunto refere no iha Orçamento Retificativo tau osan hodi sosa carreta foun, nune'e bele facilita guarda prisional sira-nia serbisu.

Iha-ne'e la'ós de'it ba guardas prisionais maibé, se bele, tau mós atu sosa carreta ba iha defensor público ho nune'e sira bele acompanha preso sira ne'ebé ita hateten katak kbiit-laek.

Iha-ne'e ha'u secunda mós saida mak Deputado Gabriel ko'alia, kona-ba natar sai fali cidade ka sai fali uma. Iha-ne'e, hanesan Deputado, ha'u husu ba Governo, liuhosi Ministério da Justiça, tem que tau-matan ba assunto ida-ne'e, tratamento ba rai iha dimensão económica social, política, cultural no defesa e segurança nian. Iha-ne'e ha'u husu ba Governo atu halo planeamento hodi ordena

território no kona-ba *land use* ka *tata guna tanah* ka uso de terra no hatuur iha plano, hatuur osan, tau osan, no executa tuir serbisu ne'ebé planeado tiha ona.

Ida-ne'e mak ha'u-nia intervenção, muito obrigado, Sr. Presidente.

Sr. **Presidente** (Alexandrino Afonso Nunes): — Obrigado, Deputado.

Tuirmai, Deputado José Virgílio.

Sr. **José Virgílio Rodrigues Ferreira** (CNRT): — Di'ak, obrigado ba Presidente em exercício, componente Mesa, Sr. Vice-Ministro dos Assuntos Parlamentares, distinta e distinto Deputado sira no povo rona-na'in sira hotu.

Iha-ne'e, dala ida tan, ha'u hakarak hato'o parabéns ba dia 2 de Agosto, Loron Município Manufahi nian, ne'ebé mak halo iha parte Luak nian. Parabéns dala ida tan ba povo Manufahi tomak.

Tuirmai, ha'u hakarak hato'o ha'u-nia intervenção ida-ne'e sobre assunto ida kona-ba sira ne'ebé mak desde tempo Indonésia to'o mai agora, associação transporte nian, Associação Timoroan ba Transporte, *standby* iha porto Díli. Sira iha-ne'ebá, depois agora muda fali ba Tibar, se la sala iha tempo Sr. Ministro Agostinho nian, Ministro dos Transportes e Telecomunicações, iha momento ne'ebá sira iha problema ida ho loja Toko Lay, ne'ebé mak halo contrato ho sira, tula cimento, tula sasán sira todatodan ne'e to'o montante tonelada ida. Sira dehan: «Iha CNRT nia tempo buat hotu-hotu la'o di'ak. Agora, iha fali tempo ida plataforma nian ami hanoin katak bele ajuda ami, maibé sira hatún preço ba cinco dólar». Agradece tebes ba Ministro, momento halo duni contrato ida ho sira, husu ba loja-na'in tem que hasa'e ba *tujuh dolar lima puluh sen* ida, se la sala. Ida-ne'e sira continua la'o nafatin to'o porto ne'e muda ona ba iha Tibar ne'ebá. E depois, to'o agora kala atu besik tinan, loja-na'in seidauk selu sira, problema ne'e sira hakarak hatún fali preço ne'e ba iha cinco dólares cada tula sasán tonelada ne'e ida ba iha carreta ne'e. Ne'ebe, ha'u-nia hanoin, sira hakarak hato'o iha-ne'e, parece sira mós hakarak atu hato'o carta atu mai iha Comissão E ho Comissão D hodi haree assunto ida-ne'e.

Bele fó-hatene ba Sr. Ministro ne'ebé mak husi IX Governo, Sr. Miguel Manetelu, ne'ebé mak tutela ba iha Ministério ne'e hodi haree tanba assunto ida-ne'e importante tebes.

Tuirmai, hakarak fó-hatene ba Sr. Ministro katak iha Município Covalima, jogo sira-ne'ebé mak agora ita haree daudauk ne'e la hatuur iha nia fatin ona. Cada vez ami ba iha Município Covalima ami haree katak kalan ami liu bá iha-ne'ebá, começa labarik ki'ikoan sira, jovem sira mós mete iha jogo, ba taka osan e comunidade iha-ne'ebá mak hateten duni. Sira dehan katak «Ami iha mercado ne'e dala ruma fahi e manu lakon fali», ne'e comunidade mak hato'o duni. Jogo ne'e iha município Covalima mak hanesan ne'e, maibé município sira seluk mós sei iha balu.

Aprecia tebes ba Município Manufahi tanba jovem e comunidade sira la aceita jogo bola *guling* ne'ebé mak atu loke iha momento ne'ebá, sira haruka pára tiha.

E depois ha'u mós husu ba Diretor Jogos ne'e, nia dehan hanesan ne'e: «Lae, iha momento ne'ebá ne'e Governo precisa osan. Loke jogo ida-ne'e hodi tau osan ba Orçamento Geral do Estado hodi halo desenvolvimento». E Diretor ne'e ha'u ko'alia ho nia, ha'u dehan: «Eipa, Diretor, hanesan ne'e halo nu'usá mak ne'e?».

Tuirmai, ha'u hanoin, Deputado sira ohin questiona kona-ba Oe-Cusse. Ha'u fiar katak Deputado Natalino foti ne'e realidade duni, la inventa, la iha saida..., tanba ita-nia Força ne'e ida de'it, ita labele compara Força FDTL (Forças Armadas de Libertação de Timor-Leste). Força F-FDTL ne'e maihusi FALINTIL, ita labele compara fali Força ne'e ho *ABRI (Angkatan Bersenjata Republik Indonesia) Masuk Desa*. Ne'e Ita-Boot, Deputado ida, ko'alia compara *ABRI Masuk Desa* ho fali Força F-FDTL, hanesan Deputado timoroan, ha'u la simu ida-ne'e. Ne'ebe husu ba Deputado ne'ebé mak ko'alia, sukat ibun! Keta 2000 ne'e mak foin mai karik ha'u la hatene, mas quando hatene Força FDTL, FALINTIL, ne'e Força povo nian, Força Timor nian.

Obrigado.

Sr. **Presidente** (Alexandrino Afonso Nunes): — Obrigado.

Tuirmai, Deputada Helena Martins Belo.

Sr.^a **Helena Martins Belo** (FRETILIN): — Obrigado ba tempo.

Bom dia ba ita hotu, ba Presidente em exercício, composição da Mesa, Vice-Ministro dos Assuntos Parlamentares, colegas Deputados, povo rona-na'in, maubere no buibere.

Primeiro, ha'u atu coloca kona-ba Sr. ida ho naran Domingos Ximenes, ne'ebé halo tratamento iha Bali, no iha quarta-feira lori ninia documentos mai hasoru iha Comissão F no entrega ona ba Sr. Vice-Ministro Brandão, oinsá mak atu processa hodi nia halo fali tratamento tanba ninia tratamento precisa duni iha Bali. Tuir fontes husi ne'ebé ami simu informação katak nia mai tanba iha Senhor adido naran Pedro mak haruka nia filafali mai, maibé agora daudauk nia condição grave no iha semana kotuk nia mai iha recinto Parlamento ida-ne'e atu fó informação ida-ne'e, oinsá mak ita bele canaliza para nia bele acesso fali ba ninia saúde iha Bali.

Tuirmai, ba iha folin foos ne'ebé continua sa'e. Foos folin ne'e la'ós semana ida mak sa'e, loroloron, quase horas, minuto ruma ne'e sa'e. Então, ida-ne'e especulação preço mak mosu ka saida mak acontece? Tanba la'ós dehan semana ida mak sa'e cinquenta cêntimos, maibé horas de'it, iha horas ruma começa ona sa'e cinquenta cêntimos, um dólar. Tanba ne'e mak ami husu atu oinsá bele normaliza tanba bele mós acontece especulação de preço, maibé oinsá atu normaliza para ita-nia povo sira bele iha acesso ba compara.

Iha mós informação katak produtor balu mós atu taka ona ninia produção, liuliu foos, mai Timor-Leste. Ha'u-nia pergunta ba Governo: saida de'it mak prepara para ita bele assegura, ai-han, karik produtor sira taka sira-nia produto sira atu mai iha ita-nian Rain?

Tuirmai, ba iha qualidade ai-han no mós ba iha qualidade materiais construção nian, ikus-ikus ne'e, materiais construção nian mak tama quase ladún iha qualidade. Ita-nia badaen sira fó informação katak besi ho kaleen sira mai ne'e, liuliu mak ita-nian maluk chinês sira fa'an ne'e, la iha qualidade. Então, oinsá mak ita controla para pelo menos atan-oan sira mós iha acesso ba iha sasán sira-ne'e ho duração de tempo ne'ebé di'ak, selae sira usa la to'o tinan ida besi sira-ne'e ferrugem hotu ona. Então, oinsá mak ita garante qualidade? La'ós de'it ba hahán maibé mós ba iha materiais construção ne'ebé ita iha.

Tuirmai mós ba iha, ha'u reforça nafatin ha'u-nia colega sira ne'ebé ohin husu, timoroan ne'ebé serbisu iha estrangeiros, atu situação saida de'it responsabilidade Estado ne'e perante ita-nian cidadão, la'ós husik fali ita-nia responsabilidade. Mesmo que ita-nia cidadão sala iha ema nia rain mós ita tem que iha responsabilidade hanesan país soberano ida. Tanba ne'e mak ha'u husu, atu oinsá mós tem que lori fila duni ita-nia oan sira ne'ebé mak mate bá buka serbisu iha ema nia rain hodi mai hakoi tuir ninia lisan no cultura.

Ikusliu, ha'u atu husu: ausência husi ita-nia Presidente da República no mós ita-nia Presidente do Parlamento, ida-ne'e bele ka lae?

Vice-Ministro dos Assuntos Parlamentares mós uluk assume cargo hanesan Presidente do Parlamento, hatene muito bem oinsá. Se ida-ne'e husik mamuk hanesan ne'e, iha ninia efeito ruma ka lae?

Ida-ne'e mak ha'u-nia pergunta ikus.

Obrigado.

Sr. **Presidente** (Alexandrino Afonso Nunes): — Obrigado, Deputada.

Di'ak, haree filafali ba inscrições ne'ebé mak tama, iha-ne'e por volta de vinte. Agora iha mós iha-ne'e iha ponto de ordem ida, ohin ha'u taka ona, maibé ida de'it, ne'ebé husi Deputado Florentino Ximenes e la iha tan ponto de ordem, para ita bele avança nafatin ba discussão ne'ebé iha.

Obrigado.

Sr. **Florentino Ximenes da Costa «Sinarai»** (FRETILIN): — Deputado, ida ha'u dehan ne'e sira ne'ebé *mental ABRI Masuk Desa* ne'e tem que hasai, F-FDTL ne'e ita-nia instituição ne'ebé lulik, que ema lori vida hira mak sosa.

Deputado ida-ne'e, quando ha'u la'o hamutuk ho nia maun Peu, nia sei inus-been hela, lalika mai hanorin ha'u sobre sentido de responsabilidade!

Obrigado.

Sr. **Presidente** (Alexandrino Afonso Nunes): — Obrigado.

Antes atu continua, Mesa taka ona inscrições tanba ita iha-ne'e iha vinte, ne'ebe ita pára ho inscrição vinte ne'e.

Tuirmai, Deputado Óscar de Araújo.

Sr. **Óscar de Araújo** (CNRT): — Obrigado, Presidente em exercício.

Bom dia ba Ita, composição da Mesa, colega distinta e distinto Deputado sira hotu, Excelência Sr. Vice-Ministro dos Assuntos Parlamentares, mídia ka jornalista sira e rona-na'in sira.

Iha-ne'e iha assunto balu ne'ebé atu hato'o hela ba Sr. Vice-Ministro atubele encaminha hela ba Ministro relevante sira.

Ida, kona-ba sinais de trânsito sira iha capital Díli laran ne'e, iha balu que ninia atravessa ne'e rua. Por exemplo, ida iha MSS (Ministério da Solidariedade Social) ninia oin ne'e, ita atu haree loloos mak ida ne'ebé? Ida atravessa ida iha sorin kala dois metros ou três metros hanesan ne'e ida iha sorin tan, ne'ebe ita atu pára loos ba ida ne'ebé, pára loos ida iha primeiro ka pára iha ida segundo? Ou karik keta iha regra ruma mak hanesan ne'e, ita precisa hetan informação ruma husi DNTT (Direção Nacional dos Transportes Terrestres) para ita bele naran sá...

Ida seluk mak iha direção ida iha Hudi Laran nian ne'e, quando ita tesik husi Bairro Pité tun mai, ida husi Manleu nian mós tun mai, iha ida ne'ebá ne'e, direção tun mai ne'e rua, ne'ebe loloos ne'e ida tau atu sa'e fali husi Hudi Laran nian ne'e la bele. Mas rua tun mai nia fó ida tama fali mai Bairro Pité, ida ba fali Elemloi sa'e ba *jalur* 06, mas continua nafatin carreta balu atravessa sai husi ne'e. Mosu acidente ida, iha kedan ha'u-nia oin, mas sira dehan: «Agora ami atu pára ka labele liu, mas sinais la iha-ne'e?». La iha sinal ida tau iha-ne'ebá dehan katak labele atravessa ka labele usa dalan ida-ne'e ne'e, ne'ebe, husu atu DNTT bele haree para labele contribui ba desastre.

Ida seluk, kona-ba lixo. Lixo ne'e, se bele, husu ba autoridade município ne'ebé hola responsabilidade ou gere ne'e, tau horas atu foti ne'e ba comunidade sira para bele contribui ho di'ak, selae horas foti tiha lixo nian hotu tiha ona, carreta foin liu ho liu, lixo continua fali tan ona iha fatin tau lixo nian, ne'ebe, ita nota dehan katak dehan serbisu ida-ne'e ne'e parece la la'o. Se bele, husu para horas foti nian ne'e mak tau para bele foti, liu ona labele, depois de loraik nian foti fali mak lori ba, selae anin huu, estrada laran sira nakonu ho lixo hotu.

Seluk mak, ami-nia contacto eleitoral sira iha kraik ne'e, ita-nia professor sira, lubun, husu atu Governo ida-ne'e, liuliu Ministério Educação, bele soluciona estatuto dos professores. Balu que contratado mais de 10 anos, ne'ebe, husu atu Ministério bele soluciona ka fó ona sira-nia estatuto ne'e para ba oin ne'e sira bele iha serbisu ida ne'ebé mak mais naransá liu, selae sira dehan: «ami

contratado tinan naruk loos, ami-nia *nasib* ne'e hanesan ne'e hela de'it be dala ruma imi exige, exige, dehan qualidade, qualidade, pontualidade, buat sira-ne'e hotu, mas ami la hatene ami-nia *nasib* ne'e to'o bainhira mak bele naransá... ».

Ida seluk mak atu husu ba IGE (Instituto de Gestão de Equipamentos), foin daudauk udan boot rai monu barak ne'e, intervenção iha ona, mas iha fatin lubun ida que estrada sira direção ba Ainaro no Same ne'e rai sei nafatin nakonu hela iha valeta sira-ne'e, seidauk hamoos hotu. Ne'ebe, husu atu IGE bele continua para hamoos tiha rai sira ne'ebé sei iha valeta sira-ne'e.

Ida fali, comunidade husi Suco Mauchiga, karik mós ba sira seluk, husu atu obras públicas, liuliu ba eletricidade nian ne'e, atu acelera lailais ahi iha Suco ida-ne'ebá, tanba serbisu lubuk ida naransá ona, mas falta percentagem uitoan de'it, tanba sira mós dehan hakarak atu acompanha atividade sira Nação nian ne'ebé iha Orçamento Geral do Estado no sira seluk ne'e, sira mós hakarak acompanha para sira bele hatene ninia andamento ka ninia evolução sira.

Ohin colega Deputado iha sorin ne'e ko'alia kona-ba 30 dólares ne'e, ita talvez besik ona naransá... depois Excelência Sr. Ministro mai bele confirma diretamente para bele hetan explicação ida clara. Ha'u hanoin katak ema sira-ne'e sei labele hanoin buat ne'ebé maka atu la contribui ba Nação ida-ne'e, mas, claro liu bele hein ninia presença, iha tempo badak ita sei hasoru malu, bele confirma iha Parlamento para bele hetan ninia explicação ida clara.

Kona-ba sasán folin sa'e, agora ita questiona, mas ita haluha tiha iha ba kotuk ne'e ita rasik iha Parlamento mak contribui para hodi hasa'e tiha sasán nia folin. Ne'ebe, agora ita tem que muda fali tuir ninia dalan ou ninia norma ne'e foin bele passa.

Sr. **Presidente** (Alexandrino Afonso Nunes): — Tempo, tempo.

Sr. **Óscar de Araújo** (CNRT): — Obrigado, ha'u-nia matéria mós hotu.

Sr. **Presidente** (Alexandrino Afonso Nunes): — Tuirmai, Deputada Aliança Araújo.

Sr.^a **Aliança da Conceição Araújo** (CNRT): — Obrigada ba oportunidade.

Bom dia dala ida tan ba Ita-Boot sira hotu, iha laran no mós iha li'ur. Ohin ha'u la temi Mesa do Parlamento, bom dia ba Ita-Boot sira iha Mesa do Parlamento.

Ha'u-nia intervenção ne'e loloos ha'u foti tiha ona iha semana kotuk, mas, tanba esgotado tiha be, pronto, ohin ha'u foti filafali.

Em primeiro lugar ha'u atu secunda de'it ha'u-nia maluk Deputado Natalino nia intervenção ne'ebé ohin nia ko'alia, *memang* loos duni. Se la loos karik nia labele ko'alia maka'as iha Plenária ida-ne'e.

Ha'u-nia maluk Deputado seluk hatete «uluk balu sei inus-been suli», loos duni, ne'e uluk, *lain dulu lain sekarang*, agora Deputado. Ita hotu-hotu iha-ne'e mesak Deputado hotu, la iha ida que inus-been suli hela iha-ne'e. Ida-ne'e.

Ida fali, ita hotu iha laran ne'e mesak boot, mesak representante povo nian, mesak ho naran boboot, ita-nia liafuan atu ko'alia ba malu ne'e mak ita tem que *jaga* uitoan, labele ko'alia hanesan fali ema sira iha li'ur, la hatene educação, la hatene saida... Balu que hanesan presidente ba ida-ne'e, presidente ba ida ne'ebá, ne'e mós tem que *jaga, jaga* di'ak liu ita-nia liafuan para ema bele respeita ida, selae ita mak hanorin uluk malcriação ba sira seluk, então sira bele ko'alia arbiru de'it. Se ita mak uluk ona, então sira dehan: «sira mós nune'e, be ha'u ne'e saida fali?». Ne'ebe, ita tem que *jaga* ita-nia liafuan, labele hatete tun hatete sa'e naran arbiru. Nervoso mós ita tem que controla, la'ós nervoso mak controla fali ita.

Ha'u secunda mós Comissão F ne'ebé ninia relatório semana uluk apresenta, kapás tebetebes, sira mós serbisu maka'as, bele meio-dia mós sira la descansa até loraik, fora da hora e relatório ne'e mós furak. Só buat oan ida de'it, ha'u la hatene se ha'u mak la haree ka ha'u la rona, husu ba Ministério competente ne'e atu sosa ai-moruk karik, haree mak ida labele nia data ne'e atu *expire* ona ne'e, selae sira sosa ai-moruk ne'ebé hela de'it fulan neen ka tinan ida atu *expire* ona, sira bá sosa ida-ne'e tanba barato uitoan, depois mai la to'o dehan katak atu fahe ai-moruk sira-ne'e hotu ita soe de'it. Ne'ebe, ida-ne'e ha'u hameno hela.

Ida fali seluk, kona-ba ita-nia labarik-feto sira ne'ebé dala barak ita rona dehan soe labarik, soe labarik, sira isin-rua depois ita la hatene, haree la kle'ur nia soe labarik iha fatin fatin sira-ne'e, ita labele fó sala ba labarik feto sira-ne'e de'it, labele! Tem que mós fó sala ba sira-nia *orang tua*, sira-nia inan-aman, tiun, tian ne'ebé hela ho sira. Não me digas sira isin rua, sira-nia inan-aman la hatene, ha'u la fiar! Sinais ruma que hatudu katak sira isin rua. Sira la hatene aconselha labarik feto sira-ne'e, husik sira la'o sira-nia, bele-bele balu hirus tan sira, baku tan sira, dulasibun ba sira, ne'e la loos! Uluk uluk, agora ne'e oin seluk, ita tem que fó atenção ba sira, fó moral ba sira para sira mós sente bem acomodado para sira cuida sira-nia an to'o labarik ne'e moris, la interesse dehan aman atu haree, aman la haree. Ita feto, «feto forte nação forte», tem que ser cuidado ita-nia oan. E, la'ós ha'u hatete hanesan ne'e be dehan labarik mane sira be fó hela oan ba sira-ne'e atu dehan *lega*, lae! Sira mós mane, jovem, atu halo buat ruma, hanoin, sukat! Bele ka la bele, to'o ona tempo dehan katak atu hamutuk ho labarik feto ne'e ka lae. Tem que haree mós ida-ne'e, jovem sira-ne'e, imi mesak bonito bonita maibé imi halo buat ida-ne'e mak halo ita la simu. Ne'e be, ha'u husu ba labarik feto sira-ne'e...

Sr. **Presidente** (Alexandrino Afonso Nunes): — Deputada, bele conclui! Tempo to'o ona.

Sr.^a **Aliança da Conceição Araújo** (CNRT): — Ai, haree, ha'u ko'alia uitoan de'it hotu tiha ona, la buat ida. Mais cinco minutos bele ka lae, Sr. Presidente interino?

Sr. **Presidente** (Alexandrino Afonso Nunes): — Labele!

Deputado sira hamnasa.

Sr.^a **Aliança da Conceição Araújo** (CNRT): — Ne'ebe, ha'u husu ba labarik sira-ne'e atu haree didi'ak, atu hanoin didi'ak, atu halo buat ruma sukat, ne'e para fó mós imi nia...

Sr. **Presidente** (Alexandrino Afonso Nunes): — Tempo, tempo.

Sr.^a **Aliança da Conceição Araújo** (CNRT): — Sim, então ha'u termina ona. Falta tan buat balu iha-ne'e, ba idosos ninian, maibé idosos ninian di'ak ona...

Sr. **Presidente** (Alexandrino Afonso Nunes): — Tempo, tempo.

Sr.^a **Aliança da Conceição Araújo** (CNRT): — ... Sira hein de'it ona, depois Orçamento Retificativo hotu ona, sira bele simu ona sira-nia osan, tanba sira-nia osan aumenta ba 57 dólares, la'ós 50 dólares.

Obrigado.

Sr. **Presidente** (Alexandrino Afonso Nunes): — Tuirmai, Deputado António Calau.

Sr. **António Moniz Calau** (FRETILIN): — Di'ak, obrigado ba oportunidade.

Ha'u-nia respeito ba Presidente Parlamento Nacional em exercício, composição da Mesa, Excelência Vice-Ministro dos Assuntos Parlamentares, distintos e distintas Deputados, povo rona-na'in iha-ne'ebé de'it Ita hela ba, bom dia, saudações combativas.

Depois de ami sira, Deputado foun, tama iha ita-nia Uma-Fukun ida-ne'e, ami observa, ha'u pessoal observa buat ida, katak início husi fulan ita hamriik, ita canta hino nacional, Pátria Pátria. Ohin Presidente interino hatete katak hamriik ita canta, la hatete katak ita canta ne'e hodi halo saida, hodi fó honra no gloria ba ita-nia Heróis da Pátria sira, e ha'u-nia proposta, instituição Estado hotu-hotu, iha início fulan-fulan iha içar bandeira, haree to'ok oinsá ita iha Parlamento Nacional ne'e bele halo mós ida-ne'e hodi fó honra no glória ba ita-nia herói da pátria sira.

Segundo, preocupação kona-ba bee moos. Iha fulan kotuk ha'u foti iha-ne'e preocupação kona-ba bee moos iha município Díli, em geral iha território laran tomak. Horisehik ha'u tun ba terreno iha nafatin preocupação ida-ne'e e preocupação ida-ne'e ba tempo naruk ona, husi ita-nia comunidade sira iha município Díli.

Ha'u nota hela iha-ne'e katak iha área lubuk ida mak precisa intervenção imediata: Tasi Tolu, *Kampung Baru*, Ailok Laran, Fatumeta, Bairro-Pité, Taibesi, Becora, Camea foho leten, ne'e hola bee fulan-fulan, fulan ida sosa bee dala tolu, nune'e mós iha Aldeia ida Ailele-Hun, Lenuk Hun e Hera, e husu ba Governo atu halo intervenção imediata. Dificuldade sira-ne'e ita bele tau ba iha plano curto prazo ou médio prazo nian, maibé atendimento urgente, agora tama ona bailoro ita-nia comunidade hela ho sosa bee.

Tuir fali, ita ko'alia kona-ba terreno, habitação. Iha ita-nia Constituição artigo 54.º, alínea 1) ita fó direito ba ita-nia cidadão sira atu hetan rai rohan ida atu hela, iha Díli laran ita-nia comunidade sira interpreta ida-ne'e bá loos mai loos. Tanba ne'e, ha'u husu ba Excelência Vice-Ministro atu hato'o ba Governo, em coordenação ho instituição relevante sira, atu halo controlo ba terreno Estado ninian, labele husik ita-nia cidadão sira, ita-nia comunidade, bá harii tiha, hasai tiha osan lubuk ida harii tiha uma, depois ita bá sobu, ita fó impacto la di'ak ba ita-nia comunidade nia moris. Tanba ne'e, dala ida tan ha'u husu ba Excelência atu husu ba instituição relevante atu halo controlo efetivo ba terreno Estado sira atu ita-nia cidadão sira bele usa maibé usa temporariamente.

Hanoin ida-ne'e maka ha'u hato'o hela, obrigado wa'in.

Sr. Presidente (Alexandrino Afonso Nunes): — Muito obrigado, Deputado.

Tuirmai, Deputado Luís Roberto.

Sr. Luís Roberto da Silva (KHUNTO): — Obrigado.

Bom dia ba Excelência Vice-Presidente Parlamento Nacional, membro da Mesa tomak, ba Excelência Sr. Vice-Ministro dos Assuntos Parlamentares, ba colega Deputado no Deputada sira, ba mídia sira e ba povo doben Timor-Leste, hakuak boot nafatin ba Ita-Boot sira hotu.

Iha-ne'e, primeiro mak ha'u ko'alia kona-ba ita-nia funcionário sira-ne'ebé serbisu iha prisão, guarda prisional sira. Ha'u fiar katak Maun Hugo, Excelência Sr. Vice, mós hatene. Ita-nia Diretor Prisão to'o funcionário tomak, sira serbisu começa husi 2000 até à data sira-nia nível ne'e nafatin ho nível 3 no nível 2, halo nu'usá para Sr. Vice-Ministro bele ko'alia mós ho Ministro da Justiça atu halo plano oinsá para bele hasa'e sira-nia nível ne'e, tanba sira serbisu kleur demais ona. Sira-nia avaliação desempenho ne'e hato'o duni ba iha função pública, maibé de vez em quando la iha ação ida para promove sir, tanba ne'e mak ita precisa haree.

Dala ruma Deputado barak mak questiona kona-ba sira-nia facilidade serbisu, ne'e loos, kona-ba fardamento, kona-ba carreta, ida-ne'e responsabilidade Estado ida-ne'e nian, wainhira ita cria instituição ne'e, ita precisa duni facilidade. Karik carreta sira ne'ebé usa ninia duração tempo ne'e naruk demais ona, kleur demais, começa balu iha UN (United Nations) nia tempo kedas, precisa atu troca, ha'u fiar katak Governo ida-ne'e mós bele troca sira-nia carreta ne'ebé la bele atu utiliza tan ona, selae falha serviço iha terreno. Importante liu mak haree ba sira-nia salário mós, precisa atu serbisu di'ak husi ita-nia funcionário sira-ne'e, precisa hadi'a.

Tuirmai mak ha'u mós hakarak secunda colega Camarada Sinarai kona-ba atitude Força Defesa ne'ebé de vez em quando implementa regra iha kraik ne'e la tuir nia dalan. Ha'u fiar katak iha lei militar ne'ebá ne'e iha, estatuto militar mós iha, lei disciplinar iha, para regula sira.

Ne'ebe, ita Deputado sira iha-ne'e representante, em nome do povo hotu-hotu, ita mós hatene ita-nia papel, ita labele fó fali sasukat ba malu. Balu fó-hatene katak «ko'alia sukat ibun! Sukat liafuan!» ida-ne'e mós ita viola tiha regras democracia, tanba artigo começa husi primeiro to'o artigo 170.º iha Constituição la fó limitação ba ema nia direito.

Tuir loos ita sira-ne'e hamutuk atu contra cidadão sira ne'ebé absolutamente tolok ema, plano atu oho ema, ida-ne'e mak ita precisa ko'alia, limita ida-ne'e, tanba ita la'o ho cultura, Nação Timor-Leste ida-ne'e. Ba ita 65 iha Parlamento ne'e ninia *title* ne'e ida de'it, *one title one mission*, ne'ebe la iha direito ida para limite ema nia direito, tanba ita representante povo. Ne'ebe matenek-na'in Aristóteles ko'alia dehan hanesan ne'e: «labele oportunidade de'it, maibé responsabilidade!», mai Deputado la'ós tan oportunidade, maibé responsabilidade. Ida-ne'e ita precisa mós haree.

Ikusliu, Sr. Ministro, bá hato'o mós iha-ne'ebá kona-ba ita-nia negociante sira ne'ebé fa'an cigarro ilegal ne'e *terbuka* loos iha território Timor laran! Hamate ita-nia empresário privado sira, empresário nacional sira. Depois, sira be fa'an cigarro ilegal ne'e la selu taxa ba Nação ida, precisa controla máximo husi ita-nia F-FDTL sira, husi ita-nia PNTL no husi alfândega, halo nu'usa para sira tem que tau-matan máximo ba ida-ne'e, selae mak cigarro ilegal sira-ne'e agora tama iha Timor ne'e barak loos, ne'ebé bele hamate mós ita-nia setor privado sira balu. Tanba, ha'u dada lia ho Sr.^a Milena Pires, ne'ebé responsável ba iha *East Timor Trading Group* ne'e, tinan-tinan hasa'e taxa maka'as, iha tinan 10 liubá ne'e hatama receita husi taxa ne'e maka'as ba Estado, mas agora daudaun ne'e tun. Ninia impacto mak saida? Impacto mak ita-nia ema sira-ne'ebé halo ilegal ne'e, hamate ita-nia empresário sira iha rai-laran. Ne'ebé precisa controlo ba ida-ne'e.

Kona-ba taxa ne'e ha'u fiar katak tetu...

Sr. **Presidente** (Alexandrino Afonso Nunes): — Tempo hotu ona.

Sr. **Luís Roberto da Silva** (KHUNTO): — ... Governo sei tetu para hatún ka hasa'e, neutraliza filafali ka, ne'e competência Governo nian, ita haree ba realidade ne'ebé mosu.

Ne'ebe, ha'u-nia intervenção mak ne'e, ha'u entrega filafali ba Mesa.

Obrigado.

Sr. **Presidente** (Alexandrino Afonso Nunes): — Sim, tuirmai, iha ponto de ordem.

Deputado Patrocínio Fernandes.

Sr. **Patrocínio Fernandes dos Reis** (CNRT): — Obrigado.

Bom dia ba Presidente, Secretária, Sr. Vice-Ministro, distintas Deputadas e distintos Deputados e público tomak.

Loloos ha'u atu regista, mas tanba taka tiha ona, ha'u aproveita ponto de ordem atu fó de'it informação ida tanba aproveita Sr. Vice-Ministro iha-ne'e. Ita ko'alia buat barabarak mas tanba aproveita Sr. Vice-Ministro iha-ne'e, ba Orçamento Retificativo, ha'u atu fó-hanoin de'it, ha'u hatene katak Orçamento Retificativo sei la aumenta buat ruma, maibé ita-nia situação calamidade ne'ebé acontece iha fulan kotuk, ita enfrenta ne'e, município sira husi parte costa sul ne'ebá ne'e quase hotu-hotu sofre consequência sira-ne'e, família barak afetado ba buat ida-ne'e.

Hanesan iha Manufahi, quase trezentos e tal famílias afetado ba calamidade ida-ne'e, maka ami husu atu depois ministério competente atubele tau atenção. Mesmo ida-ne'e karik la iha previsão ba orçamento, mas bele ajusta uitoan atu tau atenção, tanba ne'e família barak, por exemplo, hanesan iha Alas nian quase uma hira agora aat hotu, sira buka fatin atu sai, la iha, atu hela iha-ne'ebé. Tanba ne'e mak husu atu tau atenção ba ida-ne'e. Ba família hotu-hotu, mas ha'u pelo menos bele hetan dados concretos ne'e husi município Manufahi. Mas, ha'u hatene katak husi parte costa sul, husi Suai tama to'o Viqueque ne'e hotu-hotu sofre consequência ida-ne'e, então ne'e urgência mós ba Governo atu tau atenção iha período Orçamento Retificativo nian ne'e.

Obrigado.

Sr. **Presidente** (Alexandrino Afonso Nunes): — Sim, obrigado.

Iha-ne'e iha ponto de ordem ida tan, mas ha'u atu hatete katak iha-ne'e ita regista inscrição lubun ida. Karik iha tópico ne'ebé la hanesan, bele hato'o.

Deputado José Virgílio.

Sr. **José Virgílio Ferreira** (CNRT): — Di'ak, husu defesa de honra tanba ohin temi ha'u-nia naran.

Iha-ne'e ha'u hakarak fó-hatene de'it ba Deputado, ohin temi fali inus-been ne'e, inus-been mós iha tempo ne'ebá ne'e assiste. Ha'u, quando bá iha Baucau hamutuk ho António Espírito Santo, ha'u la haree Ita-Boot nia oin ida, ne'ebe, ha'u hakarak husu to'ok ba maun António Espírito Santo. Atu bá fali iha Comoro ne'ebá ha'u la haree Ita-Boot, e atu dehan, atu contribui uitoan, inus-been mós halo.

Sede Comité Central FRETILIN agora iha-ne'ebá, BP7 ne'e, ami sira-ne'e mak bá hamoos, fase sentina iha-ne'ebá, fase hariis-fatin iha-ne'ebá, ohin Ita-Boot sira usa ba mii, ba tee iha-ne'ebá ne'e, iha CCF ne'e. Ne'e ata-oan ha'u ho ha'u-nia Maun Apeu.

Ohin temi saudoso, dehan la'ó ho matebian la haree ha'u-nia oin, la haree, dehan ha'u inus-been, ha'u atu hateten ho Ita-Boot, Deputado, ha'u quando la'ó ho Lito Rambo mós ha'u la haree ita, ami bá iha Baguia mós ami la haree Ita-Boot iha-ne'ebá, atu bá fali Ponta Leste mós ha'u la haree Ita-Boot iha-ne'ebá, atu bá fali iha Região I, II III mós ha'u la haree Ita-Boot. Ah, região IV ha'u la hatene. Ne'ebe, hakarak fó hatene de'it ba Ita-Boot...

Sr. Presidente (Alexandrino Afonso Nunes): — Deputado, tempo hotu ona!

Sr. José Virgílio Ferreira (CNRT): — ... – ne'e defesa de honra, Sr. Presidente, ha'u hakarak clarifica –. Loloos buat sira-ne'e labele temi! Tanba ohin ita foti assuntos ne'e ha'u só defende Força ita-nian ne'e, tanba labele compara Forças Defesa ho *ABRI Masuk Desa*, ida-ne'e labele! Tanba Força Defesa ne'e mai husi força natureza, mai husi força resistência ...

Sr. Presidente (Alexandrino Afonso Nunes): — Bele conclui ona!

Sr. José Virgílio Ferreira (CNRT): — ... mai husi povo, ida-ne'e mak ha'u hakarak defende, mas labele compara fali Força Defesa ho *ABRI Masuk Desa*. Ne'e Ita-Boot ema resistência saida mak ne'e? Ko'alia problema, hato'o problema, labele compara fali Força Defesa. Força Defesa ne'e Força FALINTIL, mai husi funu ida, mai husi libertação povo ida. Ida-ne'e mak ita hakarak ko'alia, labele temi, compara fali Força Defesa ho *ABRI Masuk Desa*...

Sr. Presidente (Alexandrino Afonso Nunes): — Deputado, bele conclui ona.

Sr. José Virgílio Ferreira (CNRT): — ... ha'u hakarak fó-hatene ba Deputado ne'e tem que hatene ida-ne'e, ha'u la'ós 2000, lae!

Sr. **Presidente** (Alexandrino Afonso Nunes): — Di'ak, ita tem que disciplina. Se ita ko'alia simu malu hanesan ne'e ita nunca atu hakat ba oin tanba buat barak ne'ebé ohin ita ható'o, ita sei fó tempo ba Governo atubele responde...

Sr.^a **Olinda Guterres** (KHUNTO): — Intervalo tiha lai, Sr. Presidente.

Sr. **Presidente** (Alexandrino Afonso Nunes): — ... Ita precisa halo intervalo lai iha 15 minutos, depois ita hahú filafali. Ita intervalo lai.

Obrigado.

Sessão ne'e suspende iha tuku 11 liu minuto 2 no retoma fali iha tuku 11 liu minuto 36.

Sr. **Presidente** (Alexandrino Afonso Nunes): — Di'ak, convida filafali Deputado sira atubele hola fatin para ita bele hahú.

Tuirmai, ami fó tempo ba Deputado David Mandati.

Sr. **David Dias Ximenes «Mandati»** (FRETILIN): — Obrigado, Presidente, Mesa, maluk Deputado sira hotu, ha'u-nia saudações fraternais.

Ha'u iha-ne'e halo de'it observação ida, depois hotu-hotu bele lê. Iha artigo 84.º Constituição nian, ha'u bele lê ho tétum fali para depois Ita-Boot sira rona. Se bele karik Presidente haree mós tempo porque ha'u iha ponto seluk, ida-ne'e ita-nian interesse tomak, interesse nacional.

«Artigo 84.º Substituição de interinidade. Iha Presidente da República nia impedimento temporário, Parlamento Nacional nia Presidente mak sei kaer ninia função, ka se ida-ne'e la bele, ninia substituto. Parlamento Nacional ninia Presidente ka ninia substituto ninia mandato suspende automaticamente durante tempo ne'ebé nia exerce Presidente da República ninia cargo nu'udar substituto ka interinamente. Presidente da República substituto ka interino nia função nu'udar Deputado sei preenche temporariamente tuir Parlamento Nacional nia Regimento», quer dizer que iha substituição.

Ne'ebe, ha'u-nia hanoin, ita-nia Presidente Parlamento mós ausente, ninia Vice-Presidente ida ausente, significa que ita-nia Vice-Presidente ida de'it mak iha-ne'e, ida-ne'e automaticamente substituto ba ita-nia Presidente da República, ao mesmo tempo substituto ba ita-nia Presidente do Parlamento Nacional ninian. Se ida-ne'e ita la preenche maka ita-nia Presidência da República *vacum*, e loloos karik ohin ita lalika iha Plenária ida-ne'e, maibé ita iha. Ne'ebe, bele karik ita hotu-hotu hanoin hamutuk, ha'u hein katak ha'u-nia argumentação ida-ne'e sala e Ita-Boot sira bele argumenta fali.

Ha'u atu dehan de'it hanesan ne'e, maluk Deputado sira, iha ratificação de Convenção das Pessoas Desaparecidas nos Conflitos, horishik horibainrua atu buka tuir ita-nia resto mortal sira-ne'e, parece-me que ita halo tiha ona resolução ida iha-ne'e, ha'u la hatene resolução nia destino oinsá. Mas, karik bele, resolução ne'e atu pressiona de'it ita-nia Ministro dos Negócios Estrangeiros para hala'o serbisu, oinsá mak ita bele mós ratifica Convenções das Pessoas Desaparecidas nos Conflitos.

Ida-ne'e mak ha'u atu husu.

Ida fali mak, ha'u atu dehan de'it katak karik bele ita-nia escolas primárias obrigatoriamente tem que ho ona língua portuguesa porque agora daudauk ne'e atu começa fali ona ho língua tétum. Bainhira? Bainhira mak língua portuguesa ne'e bele la'o? Ne'e cuidado! Porque ida-ne'e mak la la'o, ne'e ladún di'ak. Agora daudauk sira be hasai 4.^a classe ou 6.^o ano da instrução primária lê hotu la hatene, 6.^o ano da instrução primária agora daudaun nian ne'e equivale 4.^a classe uluk ninian. Uluk 4.^a classe de'it ne'e oin-seluk ona, e to'o ponto ida 4.^a classe sessenta e tal ninian hanorin fali ona 4.^a classe iha setenta e tal ninian. Ne'ebe Ita-Boot sira, ita hotu-hotu, hamutuk hodi hanoin ida-ne'e.

Questão Oe-Cusse ninian, bele karik, ha'u fó opinião deit, lalika ita iha-ne'e mak duun malu ida-ne'e duun malu ida-ne'ebá, karik bele husik investigação la'o e investigação ne'e atu halo apuramento das veracidades. Iha-ne'e mak ita bele hotu-hotu hanoin hamutuk fali.

Ha'u ohin ko'alia nafatin dehan 4.^a classe sira, ita-nia língua ensino tem que ser ona ho português. Se la halo ida-ne'e, uluk ha'u usa termo ida iha-ne'e, ne'ebé Ita-Boot sira hamnasa, maka «estupidificação dos timorenses», ne'e atu dehan katak atu halo beik timoroan sira, e ita labele admite ida-ne'e.

Agora mós ita tem que fó atenção máxima ba ita-nia desenvolvimento agrícola. Ita labele continua dependente ba importações de arroz, loron ruma mak ema taka, ita tata rai hotu. Agora daudauk ne'e ita ko'alia kona-ba desenvolvimento agrícola nu'udar base ba ita-nia economia.

Segurança Lorosa'e, merece ita-nia atenção, sira mós uluk iha meios de substância, mas sira, como halo cumprimento ba estratégia política balu, ohin loron sira terus. Mai ita hamutuk resolve tiha kedas sira-nia problema ida-ne'e.

E hospital ninia condições mós, Ita-Boot sira bele bá haree, até toba iha varanda mós iha ona, e ita labele impede tan iha-ne'e.

Autocarro sira la'o bá foho ne'e, ita tem que husu ba ita-nia polícia atu controla, porque ita-nia passageiro balu até tuur to'o fali iha kapón leten, ne'e mak monu? Ita-nian iha-ne'e mak halo fali de'it ona buat ida voto de pesar, mas ita-nia ema mate nafatin. Microlete ninia paragem sira-ne'e mós tem que controla, labele arbiru hanesan ne'e.

Ha'u-nia hanoin mak ida-ne'e, Presidente. Karik buat ruma la loos, Ita-Boot sira bele aumenta. Muito obrigado.

Sr. **Presidente** (Alexandrino Afonso Nunes): — Obrigado ba Deputado.

Ha'u hanoin, iha anúncio ne'ebé fó-sai kona-ba ausência Sr. Presidente da República ne'ebé bá Jakarta, depois ita haree iha artigo 80.º n.º 3 hatete katak «la to'o loron 15 bele mós fó informação deit» ita bele saida, ne'ebe, ha'u hanoin, ida-ne'e mós...

Tuirmai, Deputado Antoninho Sarmiento.

Sr. **Antoninho Doutel Sarmiento** (FRETILIN): — Obrigado, Presidente.

Respeito ba Presidente, Secretária Mesa, Vice-Ministro dos Assuntos Parlamentares, colega Deputado no Deputada sira, mídia, povo doben buibere no maubere, bom dia ba ita hotu.

Aproveita ocasião ida-ne'e, ha'u hakarak alerta ponto importante balu ne'ebé ita explora iha fim-de-semana ne'e.

Iha Manufahi, ponto primeiro maka ita simu nota husi jovem na'in-ualu ne'ebé halo serbisu voluntário iha DRTTM (Direção Regional dos Transportes Terrestres do Município) nian.

Voluntário sira-ne'e halo trabalho voluntariamente iha 2010, 2018 no 2019, no sira hetan contrato iha 2022, mas ohin sira-nia destino ne'e tem que termina, tanba ne'e mak ha'u espera katak Comissão A foin fim de semana iha Same, Manufahi ne'e, sira bele halo relatório ida inclui mós juventude sira-nia destino. Tanba sira contribui voluntariamente antes ne'e, e hatama mós receitas ba Estado, liuhusi sira-nia serbisu voluntário sira iha fatin ne'ebá, buka atu haree no considera.

Ponto segundo, wainhira ha'u haree ema mate iha Same, ita iha dificuldade tebes ba carro funerário. Ita dehan, agora ema mate iha Same husu ajuda carro funerário ne'e atu tula caixão ba mate uma, maibé às vezes difícil tebetebes tanba carreta ne'e tem que circula fali ba posto seluk. Então, tenta possível para oinsá mak Vice-Ministro atu toma nota, haree, ba oin oinsá mak ita considera katak iha posto administrativo sira tem que tau carro funerário sira iha fatin sira para facilmente ajuda ita-nia ema sira bainhira mate iha fatin sira ne'ebá.

Tuirmai, iha Turiscaí, iha rai Proclamador nia fatin, rai grande herói Nicolau Lobato hakotu vida iha fatin ne'ebá, wainhira ha'u to'o iha fatin ida, haree ema ho deficiência moris halo ha'u consciente katak ita-nia restauração independência, ita halo tiha 21 anos, no fim povo barak mós sei iha hela kotuk.

Ita consciente realidade ida, ita-nia luta atu liberta povo, mas dala barak ida-ne'e hotu mós ita seidauk atinge palavra «Libertação do Povo». Realmente, iha aldeia Fahilebo, suco Beremana, posto Turiscaí, Sr. António Hornai ne'ebé moris susar tebes, iha uma que susar atu hela ho condição ida-ne'ebé digno, nune'e mós nia Senhora rasik, Maria Sarmiento, mós iha problema fisicamente.

Foin ohin ha'u telefone diretor social atu oinsá mak bele alerta no hetan apoio lailais ba iha fatin ida-ne'e, tanba ne'e husu atubele escreve hodi considera katak tem que reduz ita-nia burocracia

ne'e para bele tau cadeira roda iha nível município sira para, bainhira ita hetan ema sira hanesan ne'e, direção sira iha nível município bele fó resposta lailais.

Tanba mós ita hatene iha condição sira iha-ne'ebá, foin daudauk udan maka'as, ita-nia agricultor sira-nia koto sira sai aat hotu kedas, agricultor sira-nia koto rahun hotu, no dificuldade tebes ba ema sira-ne'e atu moris hetan ai-han loroloron nian, tanba ita hatene katak foos, hanesan sira balu dehan ona, quase iha Turiscái iha 17 USD, 18 USD até 19 USD. Ne'e mak mercado ne'ebé ita hetan iha local ne'ebá. Tanba ne'e buka atu considera hodi haree ponto sira-ne'e, atubele considera iha Orçamento Retificativo nian bá oin.

Assunto seluk, edifício administração Posto Turiscái nian. Companhia ne'ebé kaer edifício ida-ne'e, nia hahú iha 13 de dezembro de 2021...

Sr. **Presidente** (Alexandrino Afonso Nunes): — Bele conclui?

Sr. **Antoninho Doutel Sarmiento** (FRETILIN): — ... maibé to'o ohin seidauk conclui, ita husu para bele conclui ida-ne'e. La to'o minuto, segundo tolu tan.

Sr. **Presidente** (Alexandrino Afonso Nunes): — Bele conclui, Sr. Deputado!

Sr. **Antoninho Doutel Sarmiento** (FRETILIN): — Eletricidade instalado iha Foholau, Orana no Matorek, hotu-hotu ne'e companhia sira instala hotu ona, falha que problema companhia ida halo hela instalação elétrica iha suco Liurai, ha'u hanoin katak atu haree para oinsá atu acelera ida-ne'e.

Obrigado.

Sr. **Presidente** (Alexandrino Afonso Nunes): — Obrigado, Deputado.

Tuirmai, Deputada Lúcia Taeki.

Sr.^a **Lúcia Taeki** (CNRT): — Obrigada ba tempo.

Boa tarde ba Sr. Presidente interino, colega Deputada e Deputado sira, Vice-Ministro.

Ha'u-nia preocupação ida ka rua de'it. Atu ko'alia kona-ba povo Oe-Cusse nia preocupação, liuliu sub-regional tolu, Pássabe, Oesilo no Nítibe, ne'ebé iha fulan rua ona eletricidade mate lakan mate lakan hela de'it, e aat liután iha fulan rua liubá iha inundação ka iha anin boot ne'ebé acontece, fio sira-ne'e monu tun ba rai, maibé to'o ohin loron ministério ka departamento ne'ebé toma conta ida-ne'e seidauk bá haree ou atu hadi'a, la hatene tanbasá.

Tanbasá mak ha'u ko'alia hanesan ne'e? Agora daudauk comunidade, ita hatene ema timoroan, tempo agora sira atu halo cerimónia cultural ka *adat* ruma sira precisa tebes ahi. Ne'e la'ós hanesan

uluk para ita atu halo buat sasán sira-ne'e, maibé ita hatene katak dehan iha 80% eletricidade tama ona iha ita-nia suco, maibé acontece iha Oe-Cusse la iha preocupação kona-ba eletricidade ne'ebé mate iha posto tolu ne'e.

Segundo, ha'u-nia preocupação ida-ne'e iha V Legislatura ha'u foti beibeik, iha *asrama* Ambeno, ne'e estabelece iha tempo Indonésia kedas, quase labarik 50 mak hela iha *asrama* ida-ne'e. Iha tinan kotuk, fulan-junho 2022, hetan reabilitação, husi autoridade RAEOA mak halo, maibé to'o ohin loron obra ida-ne'e abandona hela, e labarik sira sei hela nafatin iha Dom Bosco.

Wainhira ita haree iha *facebook*, ita haree ba lançamento projeto nabanaban iha Oe-Cusse, cada loron, maibé projeto ne'ebé lançamento iha tinan uluk, inclui fulan kotuk ka semana kotuk ha'u ko'alia, la halo, la continua, la tau atenção ba companhia ne'ebé kaer, companhia ne'ebé la tuir regra ne'ebé tau ona iha instituição ida-idak. Aat liután, companhia ne'ebé abandona projeto, fó tan, tuir tan *tender*, manán tan. Ne'e oinsá? Ita hakarak *kejar* bá ida fó, maibé ida seluk ita abandona.

Ida-ne'e ha'u husu ba Sr. Vice-Ministro, se bele karik coordena to'ok assunto ida-ne'e, tanba ida-ne'e la'ós ha'u foin foti ohin, maibé quase iha tinan kotuk mós ha'u preocupa kona-ba projeto sira-ne'ebé existe iha Oe-Cusse.

Mak ne'e de'it.

Obrigada.

Sr. Presidente (Alexandrino Afonso Nunes): — Obrigado, Deputada.

Tuirmai, Deputado Abel dos Santos.

Sr. Abel dos Santos (PLP): — Di'ak, obrigado ba tempo.

Bom dia ba Presidente, Excelência Vice-Ministro dos Assuntos Parlamentares, colega distinto Deputado no Deputada sira hotu, mídia no mós maluk rona-na'in sira.

Hanesan representante povo iha Uma-Fukun ida-ne'e, preocupa uitoan wainhira acompanha serbisu atendimento público balu iha Governo, liuliu iha atividade, programa Secretário de Estado da Formação Profissional Emprego, SEFOPE nian.

Foin lailais, ita hotu acompanha, iha notícia foin lailais liubá kotuk kona-ba ita-nia trabalhador rua ne'ebé mate iha rai-li'ur, hanesan iha Correia.

Ohin ita-nia distinto Deputado Sinarai cita uitoan ona, maibé ha'u atu halo kle'an, iha diferença uitoan, ne'ebé ha'u hakarak halo kle'an liu iha Uma-Fukun ida-ne'e. Se exemplo, ita-nia S. Ex.^a Secretário de Estado dehan ita-nia trabalhador na'in-rua ne'ebé mate iha Coreia do Sul ne'e entrega filafali ba família, ha'u sente, ida-ne'e problema boot ida, hanesan representa povo iha Uma-Fukun ne'e preocupa tebes. Tan nia kbiit la iha mak nia bá iha-ne'ebá, mas to'o ikus nia hetan situação ida hanesan ne'e, ita entrega filafali ba família, ida-ne'e problema. Ho razão balu tanba S. Ex.^a hatete,

«Sira sai ona husi sistema», maibé ita mós tem que hatene, hanesan timoroan, ita-nia cultura nanis tiha ona, sira bele sai husi sistema, ida-ne'e responsabilidade S. Ex.^a Secretário de Estado SEFOPE nian. Se nia sai karik husi sistema, nu'usá mak ita la cria to'ok equipa ida para buka hatene tanbasá mak tem que sai husi sistema Governo nian.

Ita haree ba ponto balu afeta mós ba relação nação rua ne'ebé cria acordo ida hodi haruka ita-nia ema bá serbisu iha rai-li'ur, maibé hanesan cidadão, ita-nia ema ne'e, quando hetan desastre hanesan ne'e, maski situação halo nu'usá, ita, hanesan Governo, tem que ser toma responsabilidade ba susar ne'ebé agora daudaun ita-nia ema sira hetan iha rai-li'ur, tanba ita hatene katak preocupação ne'ebé ita-nia família sira hasoru ne'e iha buat rua, ida, sei entrega filafali ba família ka inan-aman sira mak atu responsabiliza, tanba nia kbiit la iha mak nia lori bá buka serbisu ka buka osan iha ema nia rai. Se, exemplo, nia iha kbiit mós, ha'u sente, kona-ba comunicação ne'ebé família sira atu halo ho nação ne'ebá para atu lori sira-nia ema ne'ebé agora daudaun mate isin se iha rai li'ur mai mós à rasca bainhira ita-nia Governo la hola parte iha-ne'ebá.

Ho buat sira-ne'e hotu, aproveita tempo S. Ex.^a Vice-Ministro dos Assuntos Parlamentares iha-ne'e, se bele, encaminha hela preocupação ida-ne'e ba S. Ex.^a Secretário Estado, maske situação halo nu'usá mós husu para ita-nia S. Ex.^a Secretário de Estado tem que ser hola responsabilidade iha assunto ne'ebé agora daudauk ita-nia cidadão sira hasoru hela iha rai-li'ur.

Sira-ne'ebé bá iha-ne'ebá mós iha cooperação entre nação rua no iha cooperação mós entre Estado Timor-Leste ho inan-aman ka família sira hotu, iha acordo ida. Mas, wainhira acontece hanesan ne'e mak Governo atu hasees an husi ne'e, atu fó fali todan ida-ne'e ba família sira mak atu mesak responsabiliza ba ida-ne'e, ha'u sente, ida-ne'e problema.

Sr. Presidente (Alexandrino Afonso Nunes): — Deputado, bele conclui intervenção!

Sr. Abel dos Santos (PLP): — Ne'ebe, ha'u-nia tempo mós hotu, maibé ha'u husu ba S. Ex.^a para hatutan hela preocupação ida-ne'e ba ita-nia S. Ex.^a Secretário de Estado SEFOPE.

Obrigado.

Sr. Presidente (Alexandrino Afonso Nunes): — Tuirmai, Deputada Cedelizia dos Santos.

Sr.^a Cedelízia Faria dos Santos (CNRT): — Obrigada, Sr. Presidente.

Ha'u-nia naran Cedelízia dos Santos, mas la iha problema, Ita-Boot foin ohin be ha'u comprende.

Obrigada ba oportunidade, ha'u-nia respeito ba Ita-Boot, ba Mesa, Excelência Vice-Ministro, colegas distintos Deputados, mídia no maluk rona-na'in no sira-ne'ebé tuur hela iha ita-nia kotuk hodi acompanha ita iha Plenária dadeer ida-ne'e.

Uluknanain ha'u concorda ho saida mak ita-nia Deputado Natalino ohin foti iha nia intervenção kona-ba Oe-Cusse, ha'u fiar katak Deputado ko'alia iha-ne'e baseia ba dados mós, la'ós tur-tur mai foti de'it assunto, tanba ne'e mak ha'u concorda tebes ho nia *statement* sira-ne'e.

Ha'u mós hakarak fó-hanoin ba Mesa uitoan, tanba iha ita-nia Regimento Parlamento Nacional, iha ita-nia artigo 65.º, iha-ne'e ko'alia kona-ba gere ba uso indivíduo ou gere palavra husi cada Deputado sira, tan ne'e haree ba Deputado balu ne'ebé foti liafuan hanesan «inus-been» tau ba Deputado seluk, ha'u hanoin katak iha Regimento ne'ebá ne'e hakerek claro ona, katak cada Deputado tem que iha respeito mós ba Deputado sira seluk. Ne'ebé ha'u fiar, ha'u husu mós ba Mesa no ba Deputado sira, favor ita mós lê didi'ak ita-nia Regimento sira-ne'e, keta halo bá ita mak contra filafali buat ne'ebé hakerek tiha ona iha Regimento.

Tuirfalimai, ha'u-nia intervenção hanesan representante povo, hanesan feto ida, tuur mós iha estrutura partido nian, iha organização mulher partido, ha'u lamenta no condena tebes ho ita-nia Administrador Posto Lautém ninia *statement*, ne'ebé la encoraja feto sira hodi sai candidata iha ita-nia eleição suco iha fulan-outubro tinan ida-ne'e nian. Nia *statement* ne'e todan tebetebes.

Ita haree katak ita-nia Constituição RDTL, artigo 16.º no 17.º ne'e ko'alia muito bem kona-ba direito feto ho mane nian. Ita-nia Constituição ne'e fó ona dalan ba feto sira bele participa iha festa democracia ida-ne'ebé de'it, maibé ita-nia administrador posto ida-ne'e, hanesan liman-ain Governo nian, liman-ain Estado ida-ne'e nian, tuir loloos nia mak tem que garante andamento Constituição, regulamento Nação ida-ne'e nian iha terreno, tanba nia mak besik liu ba povo. Agora, nia lori fali buat cultura, ita Timor, ita hotu-hotu iha cultura, ita mai husi cultura ida própria. Ha'u fiar katak cultura mós la halo discriminação entre feto ho mane, tanba ne'e mak ita dehan iha fetosaa uma-mane ne'e iha-ne'ebá. Maibé agora ita-nia Administrador ida-ne'e foti fali liafuan ida-ne'e atu contra fali festa democracia ida-ne'e, tanba ne'e mak ha'u husu ba S. Ex.^a Vice-Ministro, halo favor coordena hela ho Ministro Estatal para foti ação ruma contra ita-nia administrador ida-ne'e, tanba nia contra ona Constituição no nia mós taka dalan ba ita-nia maluk feto sira atu candidata sira-nia an.

Ha'u aprecia ba grupo feto Lautém nian ne'ebé foin halo sira-nia *press conference*, ne'ebé declara katak cultura ida-ne'ebá ne'e la'ós atu taka dalan ba feto, então ita aprecia ba ita-nia maluk feto sira-ne'ebé barani ona hato'o sira-nia *statement* hodi contra ita-nia Administrador Lautém nian ida-ne'e.

Tanba ne'e mak ha'u, hanesan feto ida mós, hanesan ohin ha'u dehan ona, tuur mós iha estrutura partido nian, iha organização mulher partido, ha'u encoraja nafatin ita-nia feto maluk sira, halo favor ida lalika ta'uk ho ameaça, ho *statement* oioin husi ita-nia Administrador, ita-nia Lia-Na'in,

ita-nia Liman-Ain Governo nian iha base ne'ebá! Ha'u husu Ita-Boot sira atu labele ta'uk tanba iha mós ita-nia heroína barak, feto barak mak fó nia vida hodi harii Nação ne'e mak Sr. Administrador ohin loron mós goza sai hanesan administrador posto ida. Tanba ne'e mak se nia contra ida-ne'e, nia mós contra feto ninia contribuição ba funu ida-ne'e, ba luta ukun rasik an ida-ne'e.

Tanba ne'e, dala ida tan, ha'u husu ba Ministro Estatal atu toma ação ruma ba ita-nia administrador ida-ne'e para iha futuro labele taka dalan ba feto sira atu participa iha eleição suco, la'ós suco de'it, ha'u hanoin katak la kleur tan iha mós eleição municipal nian, feto sira encorajada atu candidata nia an.

Dala ida tan ha'u husu ba maluk feto sira, labele ta'uk! Ida-ne'e mak ita-nia luta, desde uluk kedas ita hasoru buat boot hanesan ne'e contra ita, maibé ha'u fiar katak hamutuk ita sei lori, ita sei contra buat sira-ne'ebé taka dalan ba ita, feto sira.

Mak ne'e de'it.

Muito obrigada, Sr. Presidente em exercício.

Sr. **Presidente** (Alexandrino Afonso Nunes): — Obrigado ba disciplina tempo. E ha'u husu desculpa tanba ohin naran temi sala.

Di'ak, tuirmai Deputada Irene Gonzaga.

Sr.^a **Irene Gonzaga Sarmiento** (KHUNTO): — Obrigada ba tempo.

Boa tarde ba Presidente e ba componente da Mesa, ba Vice-Ministro, ba colega Deputado no Deputada sira hotu, la haluha ba maluk rona-na'in no haree-na'in sira hotu.

Iha-ne'e, ha'u hakarak foti assunto rua de'it: primeiro, liga ba projeto 144 ne'ebé iha V Legislatura Deputado lubun ida bá halo fiscalização, ne'ebé cria ona Comissão Inquérito Parlamentar lori bá, depois tun mai iha 43 projetos, e depois agora daudauk tun mai iha 37 projetos, tanba projeto sira-ne'e balu hetan despacho, no iha terreno ita haree sira-nia serbisu iha duni, ne'ebé balu iha contrato, maibé iha terreno ita haree projeto físico la iha.

Ha'u foti assunto ida-ne'e tanba ha'u iha Comissão E, na'in ba projeto sira-ne'e agora daudauk mai iha Comissão E, sira halerik tebetebes tanba processo ne'e kleur tebes, hela de'it ona 37 projetos, maibé to'o agora seidauk bele halo pagamento. Então husu ba Ministério das Obras Públicas atubele haree assunto ida-ne'e ho sério para bele halo processo pagamento ba ita-nia ema lubun ida-ne'ebé seidauk halo pagamento ba sira.

Tuirmai, hanesan Deputada, hakarak cita mós, agora daudauk Deputado 65, iha Deputado ida ka rua mak seidauk iha carreta. Sira seidauk bele hetan carreta Parlamento Nacional nian ka carreta *plat mean*, sira ho sira-nia carreta privado, maibé agora *ID card* rasik mós husi Parlamento seidauk oferece, ida-ne'e bele dificulta Deputado sira-ne'ebé ho sira-nia transporte privado, quando sira la'o.

Dala ruma polícia trânsito sira, ita hatene, ami uluk iha V Legislatura ho *plat* mean de'it mós sira sei hapara, sira sei investiga, satán Deputado sira-ne'ebé ho *plat* privado. Ida-ne'e hanesan husu ba Mesa, Presidente Parlamento Nacional, atubele haree assunto ida-ne'e ho sério para bele oferece *ID card* ba Deputado sira, di'ak liu ba Deputado sira hotu-hotu, tanba ita haree Deputado ida-rua mak seidauk hetan carreta husi Parlamento Nacional.

Tuirfalimai, hakarak ko'alia kona-ba basculante sira-ne'ebé tula rai-henek. Ita haree companhia sira-ne'ebé usa basculante tula rai-henek iha ponte Comoro 3, Delta no Comoro rasik, sira tula rai-henek sira-ne'e laho cuidado, rai-henek sira-ne'e nakfakar iha estrada laran, e depois dificulta, quando carreta sira halai bá mai rai-uut maka'as iha-ne'ebá. Maski ita haree companhia sira-ne'e iha sira-nia ema tau iha-ne'ebá para halo limpeza, maibé ita haree sira halo serbisu que la ho máximo, la ho di'ak, ne'ebé dificulta tebes ba ita-nia ema sira-ne'ebé hela besik iha-ne'ebá ou carreta sira-ne'ebé halo movimento iha-ne'ebá, rai-rahun suar tebetebes.

Husu ba Presidente Autoridade Município Díli nian atubele bolu atenção ba companhia sira refere para, karik tula rai-henek, la'ó ho cuidado atu labele nakfakar arbiru iha estrada laran.

Ha'u-nia hanoin maka ida-ne'e de'it.

Obrigado barak.

Sr. **Presidente** (Alexandrino Afonso Nunes): — Obrigado.

Tuirmai, Deputado José da Cruz.

Sr. **José da Cruz** (FRETILIN): — Obrigado ba tempo.

Boa tarde Vice-Presidente Parlamento Nacional, composição da Mesa, S. Ex.^a Vice-Ministro dos Assuntos Parlamentares, caros colegas Deputadas e Deputados, mídia no povo rona-na'in.

Iha fim de semana quase ita hotu-hotu, hanesan Deputado, representa povo, ida-idak fila ba nia município atubele hetan informação husi terreno.

Portanto, husi Município Bobonaro, liuliu iha posto administrativo rua, Posto Bobonaro ho Lolotoe, durante ne'e sofre tebes ba eletricidade ne'ebé lakan mate, lakan mate la pára rai.

Tanba ne'e, através de intervenção ida-ne'e, transmite hela ba S. Ex.^a Vice-Ministro, atu continua transmite informação ne'e ba iha ministério competente hodi bele toma atenção, tanba povo barak nia sasán estrada, liuliu sira-nia sasán eletrónico hirak ne'ebé sira iha.

Ponto tuirmai, ha'u repete tan ha'u-nia intervenção iha fulan ida liubá, kona-ba Posto Lolotoe ne'ebé afeta husi inundação fulan hirak liubá, até agora la iha intervenção husi equipa IGE (Instituto de Gestão de Equipamentos) nian. Agora carreta la bele bá mai, sasán folin, hanesan foos, iha especulação, sa'e ou ema mak hakarak hasa'e folin, ne'e prejudica fali ita-nia povo sira iha-ne'ebá. Ita-nia povo, durante estrada la iha acesso, la bele hodi sira-nia sasán mai mercado. Ida-ne'e situação

ida-ne'ebé ita precisa toma consideração ho sério, porque se sira afetado, maibé até agora la iha apoio emergência to'o iha-ne'ebá, ha'u hanoin, ne'e ita precisa haree didi'ak. Se sira afetado mak la hetan apoio emergência, então Secretário de Estado Proteção Civil nia knaar iha momento ne'ebá la halo buat ida.

Tuirfalimai maka foos. Maliana ka Bobonaro ne'ebé durante ne'e ita considera hanesan *lumbung padi*, Maliana rasik agora ne'e foos menos tebes. Foos nia folin mak sa'e husi 14 USD to'o 18 USD. Ne'e iha capital Maliana de'it mak ne'e, ha'u la hatene iha posto sira folin sei sa'e maka'as liután.

Ha'u hanoin, ida-ne'e husu ba Vice-Ministro atubele comunica ho parte AIFAESA (Autoridade de Inspeção e Fiscalização da Atividade Económica Sanitária e Alimentar) para bele halo intervenção imediata, porque sasán sira-ne'ebé nia folin sa'e dala ruma la racional.

Ha'u hanoin, ida-ne'e mak hakarak hato'o iha intervenção ida-ne'e.

Ikusliu, dala ida tan ha'u hakarak repete, Excelência Sr. Vice-Ministro, ba Posto Lolotoe ne'e ha'u foti iha fulan kotuk kedas maibé la iha intervenção até agora. Se bele, considera proposta ne'e bá para bele hato'o ba IGE para oinsá bele normaliza ona estrada Lolotoe mai iha Município Bobonaro, capital Maliana.

Obrigado barak.

Sr. Presidente: — Obrigado ba disciplina tempo.

Tuirmai, Deputado Saul Salvador.

Sr. Saul Salvador H. J. Amaral (CNRT): — Obrigado ba tempo.

Boa tarde ba Presidente em exercício, composição da Mesa, Vice-Ministro dos Assuntos Parlamentares, Deputado sira no maluk rona-na'in mak ha'u hadomi.

Assunto ne'ebé mak ha'u foti iha-ne'e, ohin ha'u-nia colega Deputado Agio cita uitoan ona, ha'u foco liu ba iha competência Ministério do Comércio e Indústria ninian, Direção Inspeção Geral dos Jogos, ne'ebé mak ho ninian regras ka Decreto-Lei n.º 6/2016, regula kona-ba atividades jogos hanesan *Lotaria*, *Slotmachines*, *Roulette*, *Bola Guling*, Futu Manu no jogo tradicional sira seluk. Jogo hirak ne'e hotu la'o ho di'ak, só que problema mosu iha terreno mak ba atividades *Bola Guling* ninian.

Comunidade sira iha Covalima lamenta tebetebes tanba depois de Governo anterior estabelece atividade hirak ne'e, hanesan ohin colega Deputado Agio hatete, na'ok-teen começa iha, sobu *kios*, na'ok manu, fahi-oan sira. Ne'e hotu afeta ba comunidade sira. Depois, jogador sira mós envolve menoridade sira hodi fó impacto ba sira-nia estudo tanba sira mesak idade produtivo e fresco hela.

Problema seluk mós, feen-la'en soe malu, fa'an carreta no motor, ne'e tanba impacto husi atividade jogos ne'e rasik.

Husi fali parte positivo nian ita haree katak jogo ne'e parte ida divertimento ba iha comunidade sira. Ida mós contribui taxa hanesan 10% ba prémio, 15% ba contribuição social, ne'e regras ne'ebé mak hatuur iha Decreto-Lei, n.º 6/ 2016, ne'ebé regula atividade jogos ne'e rasik.

Ho ida-ne'e, pergunta ida katak tuir observação ne'ebé ha'u rasik haree ba jogo Lotaria, *Slotmachines*, *Rolettes*, ne'e regula ho didi'ak, controla taxa ho didi'ak tebes. Mas, ba *Bola Guling*, IGJ nia papel controlo ne'e oinsá atu coleta taxa, coleta contribuição social? Ne'e tem que explica claro. Tanbasá? Depois de loke atividade ida-ne'e iha observação katak efeito negativo maka aas liu fali. Ho ida-ne'e mak ha'u sugere ba ministério competente ne'ebé mak foti ona *kebijakan* ka política hodi loke jogo ida-ne'e, ha'u hanoin katak precisa atu taka filafali.

Depois, jogo ida kona-ba *Slotmachines* no Lotaria loke iha Suai, ida-ne'e baseia ba regras saida? Critério saida mak de repente estabelece ona iha Suai? Tanba iha Decreto-Lei ne'e rasik hatete katak bele mós ministro adjudica direta ou bele mós tuir competição ka «tenderização», mas ho nia requisito lubun ida, companhia tem que iha fundos ka atu halo investimento ne'e 11 bilhões dólares mak merece atu loke iha fatin ida. Ho ida-ne'e mak ha'u hanoin katak ministério precisa atu haree filafali ba atividade sira-ne'e hotu tanba haree ba taxa ne'ebé mak hatama receitas ba Estado, ha'u hanoin, iha Timor, primeiro mak mina, segundo café, terceiro trabalhador sira no quarto mak jogos ne'e rasik, ho ida-ne'e mak husu ba iha ministério

Sr. Presidente: — Sr. Deputado, Ita-nia tempo remata ona.

... – lailais de'it – husu ba iha ministério competente atu haree no regula didi'ak atividade jogo hirak ne'e.

Obrigado.

Sr. Presidente: — Obrigado mós.

Tuirmai, Deputada Verónica Fernandes.

Sr.^a Verónica Fernandes (FRETILIN): — Boa tarde ba ita hotu.

Obrigada, Sr. Presidente em exercício, composição Mesa, maluk Deputado sira, mídia, audiência tomak no povo doben Timor-Leste.

Iha-ne'e ha'u hakarak foti assunto ida kona-ba situação maluk vulnerável sira, liuliu kona-ba ita-nia inan-aman sira ne'ebé mak idoso ka invalidez e maluk deficiência sira, liuliu sira ho deficiência mental no deficiência física.

Ita hotu hatene katak ita-nia Estado iha direito fó proteção especial ba sira tuir saida mak define ona iha ita-nia Constituição RDTL, iha artigo 20.º no 21.º, maibé, realidade ita haree ita-nia maluk husi comunidade rua ne'e falta de atenção husi ninia família rasik no mós husi sociedade.

Ita haree dala barak iha Díli laran ita-nia inan-aman sira, ita-nia avó sira ne'ebé mak ho idade sira-ne'ebé la bele la'ó ona, balu kabala lipa de'it, sira la'ó hasaan hela ai-leva ne'e, ne'ebé mak tara ho hudi sasuit boboot, modo ho talin boboot, sira la'ó iha condição ne'ebé mak la favorável.

Ita mós acompanha iha publicação mídia sira, por exemplo, iha mídia *online* sira no mós iha televisão sira, hanesan RTTL no GMN TV mós, fó-sai iha informação, *feature* sira-ne'e e sira fó-sai situação ne'ebé mak preocupante tebetebes. Ita hatene katak ita-nia Estado halo ona esforço lubuk ida hodi haree situação ida-ne'e, maibé esforço sira-ne'e seidauk suficiente tanba realidade ita haree, desde ita ukun an to'ó ohin loron ita sei haree situação ida-ne'e acontece beibeik. Tanba ne'e mak husu ba Ministério da Solidariedade Social e Inclusão, nune'e mós Ministério da Administração Estatal, liuliu autoridade local sira, chefe do suco no chefe de aldeia, favor ida halo coordenação serbisu ho di'ak atu nune'e bele formula apoio no halo identificação ba ita-nia maluk hirak ne'e nune'e bele formula apoio saida de'it ba ita-nia maluk hirak ne'e imediatamente.

Ida seluk fali mak hakarak recomenda ba Governo tanba ita haree ohin loron ita moris iha situação ida mundo globalizado, mundo ho digitalização, tanba ne'e mak hakarak recomenda ba iha Governo, karik bele ministério ida-idak bele tau ninia programa ka atividade sira ka relatório sira, bele mós cria *website* atu nune'e bele tau nia programa no atividade sira.

Obrigado barak.

Sr. **Presidente**: — Obrigado, Sr.^a Deputada.

Tuirmai, Deputado Anacleto Freitas.

Sr. **Anacleto Freitas** (CNRT): — Obrigado ba Tempo.

Presidente Parlamento interino no nia composição Mesa, Vice-Presidente Parlamento mak ha'u respeita, colega Deputado no Deputada sira, mídia sira mak ha'u respeita no povo rona-na'in sira mak ha'u hakru'uk. Tanba ha'u representa sira mai tuur iha Uma-Fukun ida-ne'e, tanba ne'e ha'u hakru'uk ba sira

Primeiro, ha'u hakarak hato'ó hela de'it recomendação oan ida ba Vice-Presidente do Parlamento Nacional kona-ba educação.

Foin daudauk ha'u bá Viqueque, iha ita-nia população balu hato'o queixa mai ha'u katak sira-nia oan sira hetan *juara*, primeiro lugar, depois educação iha-ne'e fó-hatene ba sira katak sira tem que bá loke conta bancária atu nune'e sira-nia osan *hadiah* ne'e bele tun ba iha sira-nia *rekening*. Tanba

ne'e ita-nia ema sira bá loke *rekening*, conta bancária, no iha semana kotuk osan ne'e bá duni ona, maibé ita-nia ema barak mak la simu. Nune'e ita-nia ema hirak ne'e bá protesta to'o iha educação, sira dehan katak «Ne'e falha mai husi nacional, la'ós iha município», tanba ne'e mak ha'u recomenda hela atu nune'e, Vice-Presidente iha-ne'e, karik bele, fó orientação ba iha direção competente atubele ba haree to'ok assunto ida-ne'e. Ne'e primeiro.

Segundo, ha'u hakarak atu recomenda tan, ko'alia kona-ba saúde.

Iha-ne'ebá ha'u mós bele bá participa, hotu-hotu mai iha hospital ne'e moras oioin de'it, maibé sira simu ai-moruk ne'e oin ida de'it fali, paracetamol, amoxicillin ho ampicillin. Ida-ne'e maka sira-nia preocupação: «Tanba saida mak moras ne'e oioin de'it, mas mai simu ai-moruk ne'e oin ida de'it fali?». Ida-ne'e mak ha'u recomenda hela para depois Vice-Presidente Parlamento, karik bele, hato'o hela ba direção competente atu nune'e bele haree mós.

Ida fali mak ha'u hakarak atu ko'alia kona-ba Deputado sira ne'ebé mak representa povo mai iha Uma-Fukun ida-ne'e.

Atan ha'u ne'e ema foun, ne'ebe dala ruma ha'u ko'alia sala karik fó perdão netik bá, maibé ita mai iha-ne'e maturidade política ne'e tem que iha, tem que respeita ema seluk bainhira ema atu respeita ita. Ida-ne'e mak ha'u hakarak ko'alia. Se ita la respeita ema karik, ninia consequência ema ko'alia ba ita mós ita tem que simu, selae ita ko'alia ba ema di'ak, maibé ema ko'alia ba ita, ita la simu, ha'u hanoin, ne'e ladún loos. Ne'e ida.

Ida tan mak ha'u hakarak atu ko'alia, kona-ba buat ne'ebé mak acontece iha Oe-Cusse, maibé ida-ne'e ha'u hakarak atu ko'alia iha-ne'e katak Força F-FDTL ne'e mai husi FALINTIL, tanba ne'e, bainhira ha'u-nia maluk Deputado sira foti, ne'e mós hanesan choque boot ida ba ha'u.

Tanba saida mak ha'u ko'alia ida-ne'e? Quando ita-nia Força tama ba iha Uaimori Tula, *pindah* mai Remexio e Remexio mai iha Aileu, saida mak acontece iha Aileu ne'ebá?

Quando ONU hatún Bandeira FALINTIL iha-ne'ebá, momento ne'ebá atu problema boot, karik ita-nia Força ruma iha-ne'e ita hatene, atu tiro malu tan ho forca ONU. Mas la consegue, ita-nia Maun Boot ba hacalma situação ida-ne'e. Tanba ne'e mak ha'u hakarak atu ko'alia iha Plenária ida-ne'e, ita tem que respeita ita-nia Força sira, labele *banding* ita-nia Força hanesan fali *ABRI masuk Desa* ne'e! Keta ema ne'e uluk la contribui ba funu ida-ne'e karik, tanba ne'e mak nia foti nia FAILINTIL-FDTL dehan fali nia ne'e hanesan *ABRI Masuk Desa*. Ida-ne'e ha'u la simu.

Obrigado.

Sr. **Presidente:** — Obrigado, Sr. Deputado.

Tuirmai Sr.^a Deputada Sância Paixão Bano.

Sr. **Florentino Ximenes da Costa «Sinarai»** (FRETILIN): — Ponto de ordem.

Sr. **Presidente**: — Sim, ha'u hanoin, ponto de ordem ne'e, se ba assunto ne'ebé mak ohin ita ko'alia ne'e, favor ida ita pára tiha tanba assunto ne'e ita sei comunica ba iha comissão competente, Comissão B, para haree sasán hirak ne'e. Ne'ebe, ha'u hanoin, ita labele halo diálogo iha Uma-Fukun ida-ne'e, tanba preocupação ne'ebé ohin hato'o husi Deputado sira-nia intervenções barak loos e intervenção hirak ne'e iha lista ne'e mós seidauk hotu. Ita mós sei fó tempo ba Vice-Ministro atu responde, clarifica buat balu, ne'ebe, ha'u hanoin, sei la fó tempo ba ponto de ordem e ha'u continua ba Sr.^a Deputada Sância Paixão Bano.

Sr.^a **Sância Florência Paixão Bano** (FRETILIN): — Retira.

Sr. **Presidente**: — Se retira, ha'u continua.

Tuirmai, Deputado Leandro Lobato, por favor.

Sr. **Leandro Lobato** (CNRT): — Obrigado, Sr. Presidente.

Bom dia Presidente em exercício, composição Mesa, colegas Deputados.

Presidente, primeiro, ha'u atu halo declaração ida, mas ha'u secunda Sr. Deputado Gabriel nia intervenção liga ho Guarda Lorosa'e.

Problema ida-ne'e lori tinan barak, sira rasik mai iha-ne'e, Parlamento ida-ne'e mós produz ona resolução ida ba sira, tanba ne'e maka exige ninia andamento para depois bele fó garantia ba sira-nia preocupação. Ne'e ita-nia maluk timoroan e sira mós contribui ba Nação, mas sira-nia *status* ne'e tem que resolve. Ida-ne'e aproveita presença Sr. Vice-Ministro nian iha-ne'e

Segundo iha lamentações mai husi *security PAX*, ne'ebe mak contrata hela hodi assegura hela banco sira, sira-nia salário, tuir contrato ne'ebé iha, 125 dólares por mês. Daudaun ne'e dehan iha aumento 11 dólares, ba 136 dólares, mas quase fulan hirak-ne'e contrato ne'e oin seluk, osan tama iha sira-nia conta la hanesan, tanba ne'e mak sira exige. Apesar de iha aumento ne'e 11 dólares, mas 11 dólares ne'e iha valor tebes ba sira, ne'ebe sira exige para oinsá bele haree sira-nia osan ne'e tuir contrato ne'ebé iha.

Terceiro, liga mós ho ita-nia polícia sira-ne'ebé destaca iha posto polícia sira, ita haree sira-nia condição ne'e la favorável, sira-nia toba-fatin mós la iha condição, *dapur* mós la iha, tanba ne'e mak sira halo comunicação verbal, sira hato'o, oinsá ministério tem que ser considera, ba oin tau iha plano para bele tau sira iha fatin ne'ebé digno no condição sira-ne'ebé favorece.

Ida fali, liga mós ho dalan ligação husi Posto Administrativo Bazartete ba Gleno, ne'ebé companhia ida constrói dalan ne'e, *Shanghai Construction*, ha'u husu atu parte ministério ho comissão ne'ebé trata assunto infraestrutura, di'ak liu Ita-Boot sira bele aproxima iha local ne'ebá, tanba companhia ida-ne'e nia executa hela obra ida-ne'e, mas ha'u haree dalan ne'e kloot tebes. Se ita halo investimento ida la adequado, aban bainrua ita sei continua halo, nu'usá mak lakoi halo alargamento ba estrada hahú kedas agora, iha fase construção?

Ha'u hanoin, ida-ne'e mak ha'u bele hato'o iha momento ida-ne'e.

Ba ita hotu nia atenção, muito obrigado.

Sr. Presidente (Alexandrino Afonso Nunes): — Obrigado, Deputado.

Ha'u hanoin, ita hotu ajuda malu para processo ne'e bele la'o di'ak e tuir corredor, Regimento ne'ebé iha.

Agora iha-ne'e iha ponto de ordem husi Sr. Deputado David Mandati, mas ha'u hakarak confirma, karik assunto foun, bele! Maibé se assunto ne'ebé liga ho ohin ne'e, ha'u hanoin, ita labele loke tan ona.

Sr. David Dias Ximenes «Mandati» (FRETILIN): — Ne'e ha'u-nia direito, Presidente! Lalika halo ida-ne'e, labele dramatiza situação! Obrigado.

Então, ha'u continua Presidente.

Ha'u atu dehan de'it hanesan ne'e: Presidente, ita tem que hatene distinção ida, comparativo dos atos não é da instituição, ita tem que claro!

Ne'ebe, ita lalika dramatiza situação, labele mai ho fali ingrediente dehan «participa ka la participa», ne'e ladún di'ak, ida-ne'e ema seluk mós buka atu halo defesa de honra. E, Presidente tem que hatene halo avaliação, labele dehan katak, «Labele! Labele!», ne'e la'ós!Direito do Deputado conforme o Regimento.

Muito obrigado.

Sr. Presidente (Alexandrino Afonso Nunes): — Obrigado, Deputado.

Tuirmai, Deputada Cristina Yuri Rebelo.

Sr.^a Cristina Yuri Rebelo dos S. Costa (FRETILIN): — Obrigada, Presidente Parlamento em exercício, Mesa, distinto Deputado e Deputada sira hotu e Vice-Ministro dos Assuntos Parlamentares, boa tarde.

Sasán folin sa'e iha mercado ne'e la'ós foin dala ida e ohin ita barak ko'alia ona kona-ba foos nia folin, ne'e la'ós primeira vez ita foin ko'alia, maibé ita ko'alia beibeik tiha ona. Ida-ne'e assunto

ida que ita hato'o tiha ona iha Plenária ida-ne'e ba dala tolu tiha ona, se ha'u la sala, iha loron ohin ne'e. Tanba ne'e ha'u hakarak husu ba Sr. Vice-Ministro, karik halo ona seguimento ruma ho ministérios relevantes, e karik iha, bele hato'o mós mai ami kona-ba ação saida mak atu foti hodi bele soluciona problema ne'ebé acontece hela ho sasán folin sa'e ne'e.

Ohin mós ha'u nota katak Deputado balu ko'alia kona-ba atu hatún taxa importação, tanba ida-ne'e mak afeta, atu dehan de'it, bainhira ita ko'alia kona-ba assunto economia, quando ita ko'alia kona-ba taxa, taxa ne'e fator ida de'it, mas ita mós tem que considera fator externa sira seluk ne'ebé afeta ba sasán folin sa'e.

Quando ko'alia kona-ba foos mais específico, Vice-Ministro, Índia rasik de'it mós hetan ona inflação maka'as, hanesan ita hotu hatene, e horas ne'e daudaun sira hapara ona exportação ba rai sira seluk. Nação ne'ebé agora daudaun hetan afeta maka'as mak Vietnam ho Tailândia, sira rasik mós exportador foos, maibé tanba Índia la halo ona exportação, afeta mós ba preço iha sira-nia rain, e ikus mai ida-ne'e sei continua afeta mós mai iha Timor-Leste.

Tanba ne'e ita hakarak hatene katak situação sira-ne'e ita tem que ser haree kle'an hodi ita responde ne'e la'ós de'it ba iha curto prazo, maibé mós ba iha longo prazo.

Ida tan, Sr. Vice-Ministro, ohin iha notícia fó-sai katak ita-nia agricultor iha Suai Loro abandona natar quase 300 ha, então ida-ne'e questão ida que ita bolu mós fator *internal* que acontece hela iha rai laran.

Ohin maluk Deputado balu mós hatete katak questão transporte no acesso ba dalan mós halo sasán folin sa'e, aspeto sira-ne'e ita tem que ser haree, haree ho kle'an para bele hatene política saida mak ita tem que halo hodi bele responde situação sira balu.

Ha'u secunda ho Deputado sira-ne'ebé ohin hatete katak irrigação ne'e importante la halimar. Ohin balu foti ona husi município Manatuto, maibé município seluk sira mós buat ne'e sei acontece, tanba ne'e dala ida tan, Sr. Vice-Ministro, husu para Governo bele tau atenção maka'as, tanba loos duni katak problema ba desenvolvimento agrícola iha rai laran ne'e boot tebetebes no ita hotu precisa atu tau-matan hodi nune'e bele assegura katak ida-ne'e sei la afeta de'it ba ita pessoal ninian ba assunto economia, maibé mós atubele ajuda ba assunto saúde no educação. Labele haluha, quando produção ne'e menos tebetebes, ema hetan acesso mínimo tebetebes, sei afeta ba condição saúde, malnutrição nia *rate*, nia percentagem ne'ebé iha agora daudaun ne'e 8.6%, ida-ne'e bele aumenta tan, no ikusmai sei afeta ba educação. Tanba dados rasik hatudu, labarik sira-ne'ebé sofre malnutrição, nia atendimento iha escola bele hanesan ho estudante sira seluk, maibé nia desempenho no nia resultado ne'e la hanesan, tanba ne'e, favor ida, Vice-Ministro, haree didi'ak situação ida-ne'e.

Obrigada.

Sr. **Presidente** (Alexandrino Afonso Nunes): — Obrigado.

Tuirmai, Deputado Virgílio Ferreira.

Sr. **Virgílio Pereira** (CNRT): — Obrigado ba biban.

Ha'u-nia boa tarde ba Presidente interino, *Sekretaris* da Mesa e Sua Excelência Vice-Ministro dos Assuntos Parlamentares.

Iha biban ida-ne'e ha'u hakarak hato'o ponto rua ne'ebé importante tebes ba situação comunidade nian, liuliu iha Município Baucau.

Iha semana rua ba kotuk ha'u foti assunto bee-moos, nafatin hanesan mós fator importante tebes ba comunidade, liuliu iha parte Kota Baru, ne'e cada comunidade tem que sosa bee husi tanque ne'e bidón ida 1 dólar. Quase maioria iha parte Kota Baru ne'e ita bele dehan katak loroloron sira tem que sosa bee. Tanba ne'e maka iha biban ida-ne'e husu nafatin ba Sua Excelência Vice-Ministro dos Assuntos Parlamentares atubele canaliza informação ida-ne'e ba iha Secretário de Estado no Presidente BTL, E.P. para depois bele haree netik assunto ida-ne'e.

Segundo, relaciona ho mudança PNTL iha Município Baucau, sai preocupação comunidade mós. Iha ami-nia comandante operacional ne'ebé assume cargo ne'e tinan barak ona, nune'e mós ho Comandante *Task Force*, ne'e quase tinan lubuk ida ona assume cargo ida-ne'e, mas de repente de'it iha mudança foti Comandante *Task Force* ne'e soe tiha ba iha Posto Venilale, e Comandante Operação muda mai liu tiha iha Díli, e la iha justificação, informação ida claro, ba sira antes de halo mudança ida-ne'e. Tanba ne'e mak atan-oan sira mós hato'o hela sira-nia lamentação ida-ne'e, tanba ne'e husu Vice-Ministro bele mós canaliza ba Comandante-Geral PNTL atubele confirma netik assunto ida-ne'e, importante.

Ponto terceiro, foin daudaun ne'e mós hetan hela mensagem ida husi Baucau, iha ita-nia comunidade balu quee horas ne'e daudaun sosa hela foos, iha mercado duni, mas 25 kg ne'e ho folin 19 dólares. Ida-ne'e preocupação boot ida, tanba ne'e husu nafatin ba direção AIFAESA, I.P. atubele haree netik assunto ida-ne'e, labele haree de'it iha Díli laran, mas, karik bele, alarga sira-nia serbisu ne'e to'o iha município ne'ebé ohin colega Deputado sira seluk mós questiona.

Ha'u hanoin, ida-ne'e mak ha'u hato'o, obrigado, Sr. Presidente.

Sr. **Presidente** (Alexandrino Afonso Nunes): — Obrigado.

Ita-nia horas agora 12h38, iha-ne'e regista ona iha ponto de ordem tolu, hela de'it mak intervenção ida, e ita halo remata tiha intervenção mak ita continua ho ponto de ordem.

Intervenção hela ida de'it, Deputada Maria Barreto. Halo favor.

Sr.^a **Maria Gorumali Barreto** (CNRT): — Obrigada ba oportunidade.

Boa tarde ba Sr. Presidente em exercício, Sr.^a Secretária no nia Vice, distinta no distinto Deputado sira hotu, Sr. Vice-Ministro dos Assuntos Parlamentares no audiência tomak.

Ha'u-nia intervenção ida-ne'e karik cabe mós ba ami-nia relatório Comissão F nian semana kotuk, apreciação, Sr. Presidente.

Ha'u hakarak clarifica ba ita hotu katak iha semana kotuk Sr.^a Presidente Parlamento cita kona-ba relatório ami-nian sobre Laboratório Nacional, katak agora la existe Laboratório Nacional, maibé tama ba iha Instituto Nacional da Saúde Pública de Timor-Leste.

Ha'u hakarak hato'o ba distinta no distinto sira hotu katak instituto ida-ne'e estabelece depois de Orçamento-Geral de Estado aprova iha Parlamento Nacional, tanba ne'e seidauk iha orçamento ba Instituto Nacional da Saúde Pública de Timor-Leste, maibé iha separação entre Laboratório Nacional ho INS (Instituto Nacional de Saúde), ne'ebe iha separação orçamento iha instituto rua ne'e. Tanba ne'e mak ami-nia relatório baseia ba Lei Orçamento Geral do Estado 2023 ninian.

Tuirfalimai, iha semana kotuk kona-ba relatório ne'ebé husi Comissão F ninian, iha preocupação no pergunta ne'ebé mai iha Comissão F dehan katak «funcionário contratado iha SAMES, I.P. (Serviço Autónomo de Medicamentos e Equipamentos de Saúde, Instituto Público) ne'e ina-na'in hira?», ne'e ami hakarak atu clarifica katak iha 13, feto na'in-haat no mane na'in-sia, ne'ebé contratado iha SAMES, I.P.

Moras ne'ebé aas iha Timor-Leste, claro moras respiratório ka *ISPA (Infeksi Saluran Pernapasan Akut)*, ida-ne'e baseia ba fiscalização husi Comissão F ninian. Quase que husi Hospital Nacional Guido Valadares to'o fali iha posto saúde iha fatin hotu-hotu, sempre relata dehan katak moras ne'ebé sira registo aas liu mak respiratório ou *ISPA* ne'e, ne'ebe ita *asumsi* katak claro moras respiratório mak aas, la precisa halo pesquisa.

Seluk, kona-ba execução orçamento Hospital Nacional Guido Valadares nian ne'ebé ki'ik, iha 36% se la sala, claro nia orçamento ki'ik tanba foin hahú construção ba expansão sala operação ne'ebé foin atu hahú no mós ho construção expansão ba bloco maternidade ne'ebé agora mós foin hahú. No mós parte ida mak recrutamento ba pessoal saúde sira hamutuk 169 ne'e mós sei pendente hela, tanba ne'e mak fó impacto ba iha sira-nia orçamento ne'ebé ki'ik.

Kona-ba Deputada Angélica Rangel ninian, reagente ne'e, ida-ne'e mak problema, ne'ebe ami mós sei halo esforço hela, sei continua hela processo fiscalização ba iha direção ne'ebé relevante, depois ita sei bele haree katak caso reagente ne'ebé la'o la tuir ninia pedido no nia problema ne'e iha-ne'ebé, depois ita sei haree tuirmai.

Sr. Presidente, ida-ne'e mak kona-ba saúde ninian.

Iha parte seluk, hanesan ohin colega Deputado sira ko'alia, kona-ba 30 dólares ne'ebé veteranos nian, ha'u hanoin, ne'e mós cabe iha Comissão F ninian, ha'u hakarak atu dehan katak Fundo Investimento Veterano nian ne'e iniciativa ida-ne'ebé positiva tebetebes ba ita-nia veterano sira iha Timor-Leste. Fundo ida-ne'e iha ninia orçamento no mós baseia ba banco balu hatete katak Fundo Investimento Veterano nian ne'e mak aas liu iha Timor-Leste. Se veterano Timor-Leste la contente ho fundo ida-ne'e, ha'u hanoin, precisa atu haree didi'ak fali ba 30 dólares ne'ebé recolha cada mês.

Fundo Investimento Veteranos Timor-Leste ninian to'o 30 de junho ne'e hamutuk 35 282 548 dólares ...

Sr. **Presidente** (Alexandrino Afonso Nunes): — Sr.^a Deputada, bele conclui!

Sr.^a **Maria Gorumali Barreto** (CNRT): — ... Sim, ha'u conclui lailais – ne'e katak investimento ida-ne'ebé husi Fundo Veterano nian mak maka'as tebes iha Timor-Leste, tanba ne'e mak iha Programa Governo veterano sira atu loke banco comercial ne'e. Ha'u hanoin, ne'e positivo tebetebes. Ne'ebe, Deputado sira semana-semana foti ne'e iha VIII Governo la questiona, mas IX Governo tanba Gil Oan Soru mai iha Ministro ita reclama nafatin ida-ne'e...

Sr. **Presidente** (Alexandrino Afonso Nunes): — Sr.^a Deputada, bele conclui!

Sr.^a **Maria Gorumali Barreto** (CNRT): — ... Ikusliu, ha'u secunda ho Deputada Cedelízia nia intervenção katak precisa loke investigação ba Sr. Administrador Posto Lautém tanba nia viola Constituição, viola mós CEDAW, ne'ebé Estado Timor-Leste ratifica ona iha Timor tanba nia mane ida ne'ebé ta'uk hakat ba igualdade género.

Obrigada barak.

Sr. **Presidente** (Alexandrino Afonso Nunes): — Obrigado.

Di'ak, intervenções hotu ona, agora iha-ne'e iha ponto de ordem haat, ne'ebe ami fó tempo uluk lai ba Deputado Antoninho Bianco. Um minuto.

Sr. **Antoninho Bianco** (FRETILIN): — Boa tarde, Presidente.

Ha'u ato fó-hanoin de'it ba Sr. Presidente em exercício.

Ha'u foin mak acompanha, Período de Antes da Ordem do Dia ohin Ita-Boot gere ne'e mak horas tolu kedas, regras dehan la to'o ida-ne'e, mas Ita-Boot usa to'o horas tolu kedas, ne'ebe la hatene loos regra foun ka lae, usa competência mak ne'e. Ne'e mak ha'u dehan fó-hanoin de'it.

Tuirmai, ha'u hatete, Presidente, Período de Antes da Ordem do Dia ne'e hanesan ne'e, baibain regra hatete, tuir loloos recreio tiha tama mai ne'e buat seluk ona. Então buat balu provoca, provoca ne'e iha Mesa, buat ne'ebé que liutiha ona mós ema balu bele tama fali ne'e mak ne'e.

Ikusmai, ha'u hatete, questão de defesa segurança, di'ak liu lalika ko'alia, assunto particular mós tama fali iha instituição, di'ak liu Comissão B trata assunto sira-ne'e. Assunto balu assunto privado, liga fali ba ida-ne'e, gaba ida-ne'e hatún ida-ne'e, ne'e la'ós nia fatin mak Plenária ne'e.

Pronto, obrigado.

Sr. Presidente (Alexandrino Afonso Nunes): — Obrigado, Sr. Deputado.

Tuirmai, ponto de ordem husi Deputado Luís Roberto.

Sr. Luís Roberto da Silva (KHUNTO): — Obrigado, Sr. Presidente.

Ha'u-nia intervenção agora ne'e relaciona ho intervenção husi Sr. Deputado David «Mandati» nian kona-ba sentido de Estado ne'ebé ita enfrenta hela agora, daudauk ne'e.

Liga ba Constituição RDTL, artigo 84.º, depois liga mós ba iha artigo 80.º, alínea 3) hanesan foin Sr. Vice mós interpreta buat ne'e, ida-ne'e buat ketak ida, maibé ita liga ba sentido Estado ne'e, karik Presidente da República sai ba li'ur la to'o 15 dias tanba ne'e la'o privado, não é? Maibé, quando la'o hanesan ne'e regra ne'e mais ou menos ita representante povo iha Parlamento ne'e nia substituição tem que iha husi Presidente do Parlamento ou Vice sira ou Deputado no Deputada mais velho, conforme decisão husi Plenária. Maibé agora hotu-hotu mamuk.

Ita ko'alia de'it, se por exemplo, hanesan ne'e mak acontece buat ruma, sentido de Estado tau ba iha-ne'ebé? Ita precisa haree ba ida-ne'e. Ne'ebe ha'u fiar katak ba futuro ita hotu-hotu hanoin halo nu'usá para hadi'a buat ida hanesan ne'e, labele halimar ho Estado, ne'e Estado! Estado la'ós ema ida ka rua ninian, ne'ebe ita precisa haree ida-ne'e baseia ba Constituição ne'ebé hakerek.

Obrigado, Sr. Presidente.

Sr. Presidente (Alexandrino Afonso Nunes): — Obrigado.

Tuirmai, ponto de ordem husi Sr. Deputado Joaquim dos Santos. Por favor.

Sr. Joaquim dos Santos «Boraluli» (FRETILIN): — Obrigado, Sr. Presidente interino.

Sr. Presidente, ha'u invoca Regimento artigo 57.º ponto f) atu observa situação ida iha Parlamento ho Presidente da República, hanesan Sr. Deputado Luís ho Sr. Deputado Mandati ohin ko'alia.

Ita ba iha Regimento Interno Parlamento ninian, artigo 14.º n.º 2 dehan hanesan ne'e: «O Presidente do Parlamento substitui o Presidente da República nos termos do n.º 1 do artigo 82.º e do n.º 1 do artigo 84.º da Constituição», artigo 82.º lalika tanba ne'e kona-ba mate.

Ita ba liu artigo 84.º, n.º 1 ne'e dehan hanesan ne'e: «Durante o impedimento temporário do Presidente da República, assumirá funções o Presidente do Parlamento Nacional ou, no impedimento deste, o seu substituto».

Portanto, Presidente República, quando sai ba rai-li'ur, menos de 15 dias ou mais de 15 dias, mas constitucionalmente obrigado Presidente nia fatin labele mamuk, ausência, em termos de Estado. Tanba ne'e mak iha n.º 3 dehan hanesan ne'e: «A função de Deputado do Presidente da República substituto ou interino será temporariamente preenchida em conformidade com o Regimento do Parlamento Nacional», ne'e mak ohin ha'u lê ba ne'e.

É que tuir loloos, Sr. ^a Presidente Parlamento ...

Sr. **Presidente** (Alexandrino Afonso Nunes): — Bele conclui, tempo to'o ona.

Sr. **Joaquim dos Santos «Boraluli»** (FRETILIN): — ... – Sr. Presidente, ha'u clarifica lai – Sr.^a Presidente do Parlamento Nacional atu sai tem que husik hela mensagem mai Vice-Presidente tanba ninia competência mak atu substitui Presidente da República. Se nia la husik mensagem mai Vice-Presidente atu exerce função constitucional, ne'e sala! Presidente do Parlamento labele sai ao mesmo tempo sai ho kedas ho ninia Vice ida bá li'ur. Uluk, quando hakerek Constituição ne'e ho pensamento ida-ne'e, ne'ebe Presidente sai, Vice na'in-rua tem que hela, ida hela iha Parlamento, ida ba iha Presidente da República, substituto.

Portanto, ha'u hakarak hatene, Presidente Parlamento husik hela mensagem mai Sr. Vice-Presidente atu halo substituição ka lae?

Sr. **Presidente** (Alexandrino Afonso Nunes): — Tempo remata, Deputado.

Ikusliu, ponto de ordem husi Sr. Deputado Patrocínio.

Sr. **Patrocínio Fernandes dos Reis** (CNRT): — Obrigado.

Ha'u-nia respeito ba Mesa.

Ha'u hanoin, tanba tempo minuto ida de'it, mas karik bele, aumenta uitoan tanba ita labele halo confusão ba público ba interpretação kona-ba Constituição.

Artigo 84.º da Constituição ne'e hatete katak iha substituto ne'e quando Presidente da República iha impedimento, sé mak impede Presidente da República iha-ne'e? Presidente da República ba li'ur informa mai Parlamento Nacional, Parlamento Nacional iha conhecimento, tanbasá

mak ita tem que halo confusão iha público? Ne'e la loos, labele halo confusão ba público! Interpreta sasán depois ba halo confusão iha público ne'e labele! Ne'e impedimento.

La iha impedimento Presidente da República iha-ne'e, Presidente da República sai bá Jacarta ho ninia função nu'udar Presidente da República, mas la husu autorização, maibé informa ba Parlamento Nacional. Ida-ne'e mak iha, la'ós iha impedimento ba Presidente da República iha-ne'e.

Tuirmai, hakarak atu dehan, tanba ita-nia situação povo ninian ne'e halo ita hotu la *sabar*, atu hatete tan de'it katak questão ida kona-ba sasán folin sa'e iha mercado ne'e ha'u mós concorda dehan iha VI Legislatura foti kala dala haat dala lima ona, maibé sasán ne'e foti começa iha janeiro 2023, ida-ne'e mak sai preocupação público nian, preocupação povo tomak nian...

Sr. **Presidente** (Alexandrino Afonso Nunes): — Deputado, tempo, Ita-Boot nia minuto hotu ona.

Sr. **Patrocínio Fernandes dos Reis** (CNRT): — ... e saida mak Governo atu halo? Sua Excelência Primeiro-Ministro hatete ona katak «Paciência uitoan, ita precisa ajusta iha Lei Orçamento Retificativo!», ne'e único dalan imediata ne'ebé Governo precisa atu hola ação.

E política sira seluk, kona-ba oinsá mak atu cria condições di'ak ne'e, ita hotu-hotu aprecia programa do Governo iha-ne'e, ita bele la'o.

Ne'ebe, ha'u hanoin, ida-ne'e mak ohin loloos atu esclarece ida-ne'ebá, mas ha'u hanoin, importante atu hatete katak Presidente da República sai husi Timor la'ós impedimento.

Obrigado.

Sr. **Presidente** (Alexandrino Afonso Nunes): — Ha'u ohin simu crítica husi Deputado balu kata primeira vez ha'u gere Mesa lori horas tolu. Agora, se ponto de ordem ne'e mak nabanaban, ida simu, ida simu, ida simu, ita nunca sai iha-ne'e. Ne'ebe, favor ida ita compreende! Ha'u hanoin, sasán sira-ne'e ita discute no interpreta buat ne'e sei sai di'ak.

Ne'ebe, ha'u hanoin, ha'u sei la fó tempo ona atu halo ponto de ordem. Agora tempo tomak ha'u entrega ba Sr. Vice-Ministro dos Assuntos Parlamentares atu clarifica no responde buat ne'ebé ohin Deputado sira hato'o.

Tempo ami entrega.

Obrigado.

Sr. **Vice-Ministro dos Assuntos Parlamentares** (Adérito Hugo da Costa): — Obrigado ba Sr. Presidente da Mesa, ba membro da Mesa tomak no ba distinto Deputado sira hotu, boa tarde.

Ha'u ohin acompanha ho ha'u-nia equipa técnica sira iha kotuk ba intervenção sira husi Sr. Deputado sira, iha 26 intervenientes.

Sr. Presidente da Mesa no distinto Deputado sira hotu, ha'u hahú ho pergunta balu ne'ebé que ha'u precisa atu fó resposta imediata quando sira seluseluk ha'u-nia equipa técnica sira regista atu halo andamento ba ministério tutela sira atu fó resposta imediata.

Sr. Deputado sira hotu, assunto ida menos de carreta ba prisão sira, ha'u hakarak liga ba ita hotu relembra fali, Governo anterior hasai política ida ba gestão de frota liga ho carreta sira Governo nian ne'ebé concentra iha património. Ha'u lamenta tebetebes rona informação ida-ne'e quando «linha ministerial sira» la inteira, la acompanha decisão Governo central nian kona-ba frota carreta nian ne'ebé concentra hotu iha gestão património ninian. Quando iha «linha ministerial sira» enfrenta problema menos carreta, bele halo pedido ba gestão património para bele iha acesso ba carreta sira ne'ebé através de Governo anterior halo ona gestão foun tanba la iha ona cargo chefia sira lori carreta Governo, sira simu de'it subsídio transporte ninian, carreta concentra hotu iha gestão de património. Tanba ne'e mak, se acontece situação sira iha prisão sira-ne'e, tuir loos diretor sira-ne'e inteira ho didi'ak decisão sira ne'ebé Governo sira halo para depois tendência hakarak sosa mak carreta foun, na realidade Governo central halo ona gestão ida-ne'e. Tuir loloos sira hatene, iha duni necessidade atu foti carreta, bele iha acesso Gestão Património Estado nian ne'ebé centralizada.

Questão seluk, sobre Sr. Deputado Sinarai nian, ha'u informa ona assunto ne'e através de carta escrita. Intervenção Sr. Deputado nian ba ministro competente veteranos ninian ba assunto ne'ebé Sr. Deputado foti, Sr. Ministro fó resposta rasik mai ha'u atu nia halo resposta ida detalhada sobre assunto ne'ebé Sr. Deputado foti liga ho questão monumento ne'ebé abandonado iha Lospalos, inclui mós questão ida sobre ko'a osan veterano sira-nian 30 USD.

Ohin Sr.^a Deputada Presidente Comissão F nian fó resposta ona, maibé Sr. Ministro inteira assunto ida-ne'e no sei fó resposta no explicação detalhada ba Sr. Deputado sira por escrito para nune'e hotu-hotu bele hetan clarificação ida mai direta husi Sr. Ministro.

Kona-ba Segurança Lorosa'e, Sr. Deputado sira hotu, ita hotu lembra, liuliu ba Sr. Deputado sira iha V Legislatura, antes de mandato Governo anterior remata, apresenta hela resolução ida mai Parlamento liga iha reconsideração ba direito Segurança Lorosa'e nian, ne'ebé fica abandonado desde 2018, se ha'u la sala, ba direito sira-nian. Então, assunto ida-ne'e ami sei acompanha, karik caducado iniciativa ida-ne'e iha Parlamento, ha'u husu Sr. Deputado sira atu reconsidera proposta ida-ne'e atu haree para depois halo andamento ba direito cidadão lubuk ida nian iha Segurança Lorosa'e, ne'ebé Estado, Governo central la tau atenção iha último cinco anos.

Liga ho carreta nafatin, Sr. Deputado António Verdial, assunto hanesan, se iha questão sira kotuk liga ho «linha ministerial sira» menos de carreta, resposta ami-nian provisória mak ida-ne'e, acesso ba frota nacional ne'ebé gestão halo iha gestão património central para halo atendimento ba necessidade transporte sira ne'ebé «linha ministerial sira» enfrenta, iha dificuldade bele acesso bá.

Kona-ba sasán folin sa'e, Sr.^a Deputada Helena, Sr.^a Deputada Cristina levanta assunto ne'e duni e ami halo ona andamento, envia ona ba ministério relevante sira atu fó repostada iha tempo badak. Maibé, hanesan ohin Sr. Deputada Presidente Comissão A, Vice-Presidente Bancada CNRT hato'o ona, katak resposta ida imediata husi parte IX Governo nian mak através de Orçamento Retificativo e política sira liga ho questão taxa ninian imediata sei apresenta mai, hanesan ha'u apresenta ona iha Conferência Líderes Bancadas nian iha semana liubá, iha sexta, katak Governo comprometido iha dia 10 semana ne'e atu submete Orçamento Retificativo, inclui ho política sira ne'ebé atu introduz liga ho questão taxa nian.

Ita hotu lembra ho didi'ak acontecimento sira iha último liga ho fenómeno hahán folin sa'e, ita mós reconsidera política sira ne'ebé ita precisa hadi'a iha gestão fronteira nian. Governo central tau atenção sério ba assunto ida-ne'e atu iha reforma sira ne'ebé ita halo iha setor finanças nian, nune'e ita fó eficiência ba atendimento ba ita-nia necessidade nacional hanesan assunto sira liga ho cobrança taxa ninian.

Ao mesmo tempo ha'u liga ho questão ida gestão de fronteira nian, liga ho aumento gráfico estatístico ema halo transação ilegal através de fronteira terrestre no mós marítima ninian, Governo central halo hela acompanhamento sério besik liu ba situação sira-ne'e.

Hanesan Sr. Deputado sira hotu hatene, semana liubá, quando IX Governo Constitucional nia orgânica entrada em vigor, semana ida-ne'e rasik «linha ministerial» hotu-hotu começa completa ninia orgânica ministerial, hanesan ne'e intervenção sira-ne'ebé «linha ministerial», membro Governo sira halo, imediata sira bele iha ona condições para bele halo intervenção sira liga ho envolvimento equipamento pesado sira hanesan ohin Sr. Deputado sira foti sobre situação normalização estrada depois de calamidade.

Iha semana hirak liubá Sr. Deputado Rogério foti kona-ba situação sira-ne'e iha Ainaro no iha Same, hanesan mós Sr. Deputado sira foti kona-ba estrada sira seidauk normaliza iha Lolotoe no mós Bobonaro, Governo enfrenta, hanesan ha'u hatete ona iha semana liubá, katak iha dificuldade iha IGE nia equipamento ne'ebé limitado, então ami la halo intervenção completa iha setor sul nian imediata.

Iha situação hanesan, IX Governo Constitucional la halo gestão seluk, por exemplo, indica companhia sira construção nian, setor privado, iha situação ida-ne'e, e dependência total ba movimento ba IGE nian para halo normalização. Portanto, ha'u hatete ida-ne'e para Sr. Deputado sira acompanha katak ho informação ne'ebé ha'u hatete, katak ho lei orgânica cada ministério começa entrada em vigor iha semana ida-ne'e, membro Governo sira iha ona kbiit atubele halo gestão sira ba assunto sira ba intervenção imediata ka ho carácter urgência. Estrada iha fatin hotu-hotu, liuliu iha setor sul, Sr. Deputado Patrocínio ohin foti, ami tau atenção sério e ho ministério sira relevante atu halo intervenção.

Kona-ba assunto trabalhador sira iha Austrália, Sr. Deputado Sinarai no Deputado sira seluk mós foti assunto ida-ne'e atu tau atenção sério, Sr. Deputado sira hotu, ami concorda Governo tau atenção ba tendência trabalhador sira-ne'ebé ba em programa pacote G2G (*Government to Government*), mas depois sira desvia husi regras ida-ne'e, então fora husi tiha controlo nian. Governo concorda ho Sr. Deputado sira-nia observação, se tendência número ne'e aumenta sai husi programa pacote ida G2G, sei afeta ba quota ba vaga sira ne'ebé iha iha Coreia no iha Austrália ba ita-nia trabalhador sira ho Timor-Leste atu preenche. Tanba ne'e mak ita hotu, ho cuidado, Governo tau atenção ida-ne'e atu ba oin previne, labele acontece trabalhador sira ne'ebé iha tendência sees husi programa G2G nian para depois tau tiha em questão, em problema, sacrifica fali trabalhador rihun ba rihun ne'ebé agora iha linha de espera atubele tama ba programa trabalhador iha Austrália nian no mós iha Coreia.

Assunto ida seluk mak Governo acompanha hela, tendência ho regulamento sira força liután iha Governo, Estado britânico nian iha último tanba Estado, iha circunstância balu, ladún haree importância atu trata assunto sira liga ho trabalhador sira acesso ba campo de trabalho iha Estado britânico. Balu através de canal husi Lisboa acesso tiha passaporte Portugal nian, depois acesso campo trabalho iha Inglaterra, mas balu usa canal ida Estado britânico ho Governo Timor-Leste ne'ebé existe tinan barak nia laran ho *free visa entrance* seis meses, ne'ebé semana último Governo britânico hapara incentivo ida-ne'e, e ita haree katak iha questão rua, iha possibilidade rua: ida, iniciativa rasik através de acesso ba passaporte iha Portugal depois de acesso mercado, e, iniciativa ida seluk mak usa incentivo ne'ebé Governo britânico fó hela ba Estado Timor-Leste ho *free visa* seis meses, ne'ebé ita lamenta tebetebes iha última semana Governo britânico hapara tiha incentivo ida-ne'e. Ita sei halo avaliação séria para haree possibilidade *lobby* ne'ebé iha para Governo britânico reconsidera decisão ne'ebé halo ona, tanba benefício ba timoroan barak tebetebes, liuliu ba campo de trabalho, e aproveitamento ba eleva sira-nia conhecimento iha setor indústria sira iha país avançado, nune'e sira filafali mai Timor. Ami regista ida-ne'e.

Kona-ba acontecimento ida Sr.^a Deputada Sância foti no mós Sr. Deputado Natalino, Sr.^a Lúcia Taeki, acontecimento iha Oe-Cusse liga ho Força, ami halo ona andamento ba Ministério atu fó resposta, maibé ha'u concorda ho saida mak Sr. Presidente Mesa orienta atu Comissão B bele toma atenção ba assunto ida-ne'e, e ha'u husu dala tan para assunto ida Defesa e Segurança nian atu debate dala ida de'it ho assunto nia continuação, entrega ba Comissão Especializada, Comissão B, para buka nia solução ou buka informação ne'e ninia veracidade atu nune'e ita la especula assunto Defesa e Segurança nian iha debate baibain segunda e terça iha Parlamento. Hanesan mós natureza Comissão B nian, fiscalização ba assunto defesa e segurança nunca mai halo relatório ka lekar iha Plenária liga ho assunto ida segurança nian, nune'e ha'u concorda ho Sr. Deputado sira-nia opinião atu delega knaar ida-ne'e ba Comissão B atu buka nia veracidade husi informação parte rua ne'e hotu.

Liga ho assunto ida Administrador Posto Tutuala nian, ami regista ida-ne'e ba Sr.^a Deputada Cedelízia ho Sr. Deputado sira seluk ne'ebé foti assunto ida-ne'e, Administrador Posto ida-ne'e ami regista ho ninia declaração tomak liga ho movimento progresso ida desenvolvimento setor ida-ne'e avançado tebetebes e, hanesan autoridade Estado nian, tuir loloos hatene ho didi'ak política Governo Timor-Leste nian liga ho igualdade género, direito cidadão hotu-hotu nian atu participa iha evento sira hanesan. Então, mensagem ka orientação husi Sr. Administrador Posto nian contraprodutivo ho progresso sira ne'ebé ita tenciona iha processo democratização Nação nian, iha central no mós to'o iha base.

Sr. Presidente, ha'u hanoin, assunto sira seluk ne'ebé ha'u la temi iha-ne'e, ami sei fó resposta imediata liuhosi ami-nia Gabinete de Apoio aos Assuntos Parlamentares ba «linha ministerial sira» hotu.

Obrigado barak ba atenção.

Sr. **Presidente** (Alexandrino Afonso Nunes): — Obrigado ba Vice-Ministro dos Assuntos Parlamentares.

Ho informação ne'ebé ohin Vice-Ministro hato'o, bele completa no mós iha serbisu balu ne'ebé ita tem que continua ba assunto ne'ebé ohin ita debate, e ba tempo ida-ne'e ami bele husu Vice-Ministro bele husik hela fatin.

Tuirmai, iha Período da Ordem do Dia ita só iha anúncio ida, anúncio ne'e ba abertura ba prazo para apresentação de candidatos e membros da Comissão da Função Pública a eleger pelo Parlamento Nacional. Tanba ita haree ba iha Regimento, artigo 191.º, data penúltima, ohin dia 7, atu apresenta candidatura ne'e iha dia 14 atubele concorre ba eleição iha dia 21 de agosto, semana oin mai.

Karik sei iha buat ruma, bele hato'o, mas iha fatin ida-ne'e mós atu hato'o katak aban ita la iha Plenária tanba la iha agenda ou matéria.

Ho ida-ne'e ita encera ita-nia Plenária ohin e, ba Deputado sira, boa tarde e bom almoço.

Obrigado.

Horas hatudu tuku 13 liu minuto 11.